

全五代詩  
附補遺

一








全五代詩

附補遺

(一)

李調元編





叢書集成  
初編

商務印書館發行



本館據函海本排  
印初編各叢書僅  
有此本

# 全五代詩序

五代詩向無全本。編詩者率皆附之。唐末宋初之間。並少專輯。惟新城王尚書漁洋有五代詩話。而所載者事蹟。詩或缺焉。竊嘗論之。梁唐晉漢周歷五代十三君。共五十二年。其間或縉紳。或隱逸。代不乏人。然各事其主。判若町畦。如梁初。或可附之唐末矣。晉漢周則去唐較遠。周末。或可附之宋初矣。唐晉漢則距宋稍遙。況兼以十國各據疆土。卽五代之君。亦不能隸其版土。而屬之。而況乎唐宋所謂風馬牛不相及者。以之附入。豈不謬乎。夫讀古人書。貴知古人之世事。君之義。從一而終。此天經地義也。而五代年間易姓僭竊。如翻鏃上餅。以致官爵益濫。小人乘君子之器。富貴出於非意。視國家安危如秦越。不相謀。故其時將相大臣。有一人而事一二朝者。有一人而事四五朝者。如後唐之馮道。所向稱臣。後梁之王易簡。幾遍五代。後漢之王仁裕。歷事八君。似處處皆可攔入。當附入何代乎。惟於其人核其生平。將受知必有最深之地。功名必有最顯之時。本其時其事。以定其爲何代之人。亦愧其不安之意也。故數年來於趨署直宿之餘。輒坐擁諸書。詳加緝核。有五代詩而爲前人附入唐末宋初者。俱一一歸還之。或應入某代。或應入某國。各按其時其事。而更於每人姓氏之下。綴以小傳。皆據各書採錄。非臆說也。蓋不如是。則不足以成五代之詩也。更於五代後附以十國。凡有斷章摘句。靡不收入。統名之曰全五代詩。共計詩九十卷。自乙未春二月至戊戌春正月。積三年而始成。雖草創經營。不無坦率。而獮祭之下。頗自信捃拾無遺。庶幾

使五十二年之文獻得以不墜。不亦可乎。我朝文教光昌。炳耀千古。近於鄉會。益以詩律。薄海內外。莫不炳炳麟麟。羣趨風雅矣。今是編之出。或亦操觚者不無一得之助也。夫大清乾隆四十五年庚子八月朔日。賜進士出身奉直大夫欽命提督廣東學政吏部考功司員外郎兼翰林院編修綿州李調元雨村甫謹序。



# 全五代詩

五代帝王廟諡年諱譜

梁朱氏都洛陽以開封爲東都二主十七年

太祖神武元聖孝皇帝晃本名溫。碭山人。初從黃巢。後降唐。賜名全忠。封梁王。天祐四年篡位。于大梁。元年丁卯三年己巳遷洛陽。在位七年癸酉其子友珪弑之。開平四。乾化二。宣陵。追尊敬祖諱茂。改茂名縣爲越常縣。兼避戊字。凡戊改爲武憲祖諱信。凡信皆爲實烈祖諱誠。兼避城成等字。凡誠爲確。新城爲新登。長城爲長興。樂城爲樂清。城郭之城爲牆。成全之成爲完。

末帝初名友貞。卽位更名鎰。貞明中又更名瑱。晃子。封均王。誅友珪立。元年癸酉。在位十一年。癸未唐兵入汴。爲其下所殺。仍稱乾化二。貞明七。乙亥十一月改。龍德三辛巳五月改。

唐本姓朱耶。賜姓李氏。都洛陽。四主十四年。

莊宗光聖神閔孝皇帝存勗。其先沙陀部人。父克用。唐末以討黃巢功封晉王。克用薨。嗣晉王位六年。紹唐正統。稱帝。元年癸未。在位四年。丙戌兵亂。中流矢崩。同光癸未四月改。雍陵。追尊獻祖諱國昌。凡昌字皆避。改昌明縣爲彰明。昌江縣爲平江。延昌縣爲延唐。義昌縣爲彬義。金昌縣爲唐山。

明宗聖德和武欽孝皇帝亶。初名嗣源。代北應州人。克用養子。同光三年爲鄴都亂兵所立。元年丙戌

入洛。在位八年。癸巳崩。天成五丙戌四月改。長興四庚辰二月改。徽陵。

愍帝從厚。明宗第三子。封宋王。元年癸巳。在位四月。明年潞王兵入。出奔遇害。應順甲午正月改。

潞王從珂。明宗養子。本姓王氏。弑愍帝自立。元年甲午。在位三年。丙申石敬瑭兵逼。自焚。清泰甲午四月改。

晉 本出西夷。姓石氏。不知所始。都洛陽。後遷開封。二主。十一年。

高祖聖文章武明德孝皇帝敬瑭。太原人。以北京留守舉兵。為契丹册立。元年丙申。在位七年。壬寅殂。天福丙申十一月改。顯陵。敬改為文氏。或改為荀氏。餘皆以恭字代之。兼避唐字。凡州縣器用犯瑭唐字者悉改之。追尊靖

祖諱瑊。兼避景影字。肅祖彬改彬為班。或為文。獻祖紹雍。兼避邕離等字。更後唐雍陵曰伊陵。

出帝重貴。高祖兄子。初封齊王。壬寅嗣位。在位五年。丙午契丹入大梁。出降。北遷。卒于黃龍府。仍稱天

福二。開運三。甲辰七月改。

漢 劉氏都大梁。二主。十年。

高祖睿。文聖武昭肅孝皇帝嵩。初名智遠。本沙陀部人。世居太原。契丹滅晉。以太原王即帝位于晉陽。入都大梁。元年丁未。稱天福十二年。明年戊申殂。更稱天福一。乾祐一。睿陵。追尊文祖。諱湍。兼避邕離端

等字。德祖昂。兼避印仰抑等字。翼祖傑。兼避裴讓撰等字。顯祖兼避典字。

隱帝承祐。高祖第二子。封周。元年戊申。在位三年。庚戌郭威犯闕。弑之。仍稱乾祐。穎陵。

周郭氏都大梁。三主十年。

太祖聖神恭肅文武孝皇帝威。邢州堯山人。以鄴都留守入汴。自立爲帝。元年辛亥。在位四年。甲寅殂。  
廢順三。顯德一。嵩陵。

世宗睿武孝文皇帝榮。太祖養子。本姓柴氏。后之姪。封晉王。甲寅嗣立。在位六年。己未殂。仍稱顯德。廢陵。

恭皇帝宗訓。世宗子。封梁王。元年己未。明年庚申禪于宋。後十四年殂。不改元。

### 附十國

吳姓楊氏。廬州合肥人。建國揚州。自唐景福元年行密入揚州起。至晉天福二年溥止。歷傳四主。凡四十六年。

前主楊行密。字化源。唐乾寧二年。封宏農郡王。天復年進爵吳王。天祐三年殂。年五十四。諡孝武。僭號太祖。  
興陵。餘人諱荇。溪曰菱。溪。揚人諱密。糖曰蜂。糖。

二主渥。字承天。行密長子。在位三年。殂。年十三。

三主隆演。字鴻原。行密第二子。在位十三年。年二十四。諡曰宣。  
武義己卯四月改。肅陵。

後主溥。行密第四子。在位十六年。丁酉。天祚三年十月。爲南唐李昇所篡。年二十八。殂。僭諡睿帝。號讓皇國亡。  
順義。太和。天祚。平陵。

南唐李氏都金陵。傳三主。三十九年。



前主李昇。初名知誥。徐州人。唐憲宗第八子。建王恪之後。初依楊行密。繼爲徐溫所育。冒其姓。仕楊氏。封齊王。受禪元年。丁酉。在位七年。癸卯。殂。諡光文肅武孝高皇帝。僭號烈祖。昇元。永陵。

二主璟。初名景通。後以避周信祖諱。更名景昇。長子。封齊王。元年。癸卯。在位十九年。辛酉。殂。戊午。以後去帝號。奉周正朔。諡明道崇德文宣孝皇帝。僭號元宗。保大十五中興一戊午改。交泰一三月又改。順陵。

後主煜。初名從嘉。璟第六子。文獻太子卒。立爲皇太子。辛酉。嗣立。在位十五年。乙亥。降于宋。封隴西公。又三年。戊寅。薨。用宋年號。

前蜀 王氏。都成都。自唐大順三年入蜀。後唐同光三年國滅。傳二主。共三十五年。

前主王建。字光國。許州舞陽人。爲唐西川節度使。封蜀王。梁開平二年。戊辰。梁篡唐。建遂于九月稱帝。在位十二年。年七十二。殂。諡神武聖文孝德明惠皇帝。僭號高祖。武成三。永平五。通政一。天漢一。光天一。永康。

後主名衍。字化源。初名宗衍。建十一子。賢妃徐氏所生。立爲太子。光天元年。六月。嗣位。在位七年。年二十八。爲後唐所滅。乾德六。咸康一。

後蜀 孟氏。都成都。自後唐同光二年入蜀。至宋乾德三年。乙丑。國滅。傳二主。共四十一年。

前主孟知祥。字保允。邢州龍岡人。爲後唐西川節度使。封蜀王。清泰元年。卽帝位。在位二十六年。年六十一。諡文武聖德英烈明孝皇帝。僭號高祖。明德一。和陵。

後主昶字保元初名仁贊知祥第三子貴妃李氏生立爲太子甲午七月嗣位降宋國亡封秦國公  
宋乾德三年六月殂年四十七諡曰恭孝明德廣政二十八

南漢劉氏都廣州自唐天祐二年入廣東至宋開禧四年國滅傳五主共六十七年

南海王劉隱彭城人仕唐爲清海軍節度使梁開平四年封南海王卒年三十八追尊襄皇帝僭號烈宗德陵

前主襲初名巖襲封丁丑梁貞明三年稱帝國號大越改號大漢在位二十七年年五十四殂諡天皇大帝僭號高祖乾亨九白龍三大有十五康陵

二主玢襲第三子初名宏度卽位更今名在位二年爲宏熙所弑年二十四殂光天二  
三主晟初名宏熙改名在位十六年三十九殂諡文武光聖明孝皇帝僭號中宗應乾一乾和十六

昭陵

後主名鋹初名繼興晟長子襲位更名在位十四年爲宋所滅國亡封恩赦侯

楚馬氏都長沙自唐乾寧三年入湖南至周廣順元年國滅傳五主共五十七年

武穆王名殷字霸國許州鄆陵人爲唐湖南節度使封楚王年七十九薨諡武穆

衡陽王名希聲字若訥武穆王次子襲位在位二年卒

文昭王名希範武穆王第四子在位十六年殂

廢王名希廣字德丕武穆王第三十五子在位四年爲希萼所弑

恭孝王名希萼武穆王第三子南唐保大九年遷于金陵馬氏國亡後馬氏將相繼鎮湖南劉言三年王逵三年周行逢六年子保權二年歸于宋

吳越錢氏都錢塘自梁開平元年起兵錢塘至宋太平興國三年歸宋傳五主共七十八年

武肅王名鏐字具美臨安人董昌反于越稱大越羅平聖人鏐討平之爲唐鎮海鎮東軍節度使中書令彭城王天復二年進越王天復四年進吳王梁開平元年加封吳越王在位四十一年年八十一殂

諡武肅天寶十四寶大二寶正六長興三

文穆王名元瓘字明寶武肅王第七子襲位在位十年年五十五諡文穆長興二應順一餘用清泰年號  
忠獻王名宏佐字元祐文穆王第六子襲位在位七年年二十諡忠獻

忠遜王名宏侖字隆道文穆王第七子卒年四十四諡忠遜

忠懿王名俶字文德初名宏俶文穆王第九子襲位舉國歸宋年六十一卒諡忠懿國亡

閩王氏都福州自唐景福元年王潮入閩至南唐保大四年國滅傳六主共五十三年

前主王審知字信通唐福建觀察副使潮之弟加節度使梁開平三年進封閩王在位二十九年年六十四諡龍懿初追諡昭武孝皇帝僭號太祖宣陵

二主延翰字子逸審知長子在位一年爲延鈞所弑



三主鱗。初名延鈞。改名審知。次子嗣位。在位十年。爲李倣所弑。諡齊肅明孝皇帝。僭號惠宗。天成四。  
長興三。龍啓二。永和。

四主繼鵬。鱗長子。卽位。更名昶。在位四年。爲連重遇所弑。永隆初。諡聖神英睿文明廣武應道大宏孝皇帝。僭號康宗。通文四。

後主義。初名延義。審知第二十八子。在位六年。亦爲連重遇所弑。諡睿文廣武明聖元德隆道大孝皇帝。永隆。

殷主延政。景宗弟。初封富沙王。兄弟相攻。遂以建州開國號大殷。改永隆五年爲天德元年。在位三年。降于南唐。國亡。諡曰恭懿。

荆南高氏。都江陵。自梁開平元年建國。至宋乾德元年國除。傳五帥。共五十七年。

武信王名季興。字貽孫。陝州硤石人。本名季昌。避後唐獻祖諱。更今名。梁開平元年。拜荆南節度使。封南平王。卒。年七十一。諡武信。

文獻王名從誨。字遵聖。武信王長子。襲位。薨。年五十八。諡文獻王。

貞懿王名保融。字德長。文獻王第三子。薨。年四十一。嗣王名保勗。字省躬。文獻王十子。嗣荆南節度使。卒。年三十九。

侍中名繼冲。字成和。貞懿王長子。嗣荆南節度使。納土歸宋。開寶中六年卒。年三十一。贈侍中。國亡。

北漢劉氏都太原。自周廣順二年立。至宋興國四年國滅。傳四主。共二十八年。

前主劉昊。後漢高祖嵩之母弟。初名崇。隱帝時爲河東節度使。已而周代漢。遂以周乾祐四年卽帝位。在位四年。年六十一。僭號世祖。

二主鈞。初名承鈞。昊次子。在位十二年。年四十三。諡曰孝和皇帝。僭號睿宗。

天會十二

三主繼恩。本姓薛氏。父釗。晉初爲護聖營卒。世祖女生繼恩。昊以鈞無嗣。令養爲己子。已而世祖女再

適何氏。生繼元。未幾何死。世祖女亦歿。睿宗復撫繼元爲子。帝立六十餘日。爲郭無爲所弑。

廣運六

後主繼元。鈞養子。嗣位。在位九年。爲宋所滅。封彭城郡公。國亡。

# 全五代詩卷一

清 羅江李調元雨村編

梁

趙光逢

光逢字延吉。京兆奉天人。唐僕射隱之子。乾符五年登進士第。拜御史中丞。唐亡仕梁。爲中書侍郎。同中書門下平章事。累遷左僕射。進司徒。拜太保。封齊國公。

五代史。光逢少以文行知名。時人稱其方直溫潤。謂之玉界尺。

梁郊祀樂章

就陽位昇圓邱。佩雙玉御大裘。膺天命擁神休。萬靈感百祿。遵秉黃鉞建朱旗。震八表清二儀。帝業顯王道。夷受景命啓皇基。開九門懷百神。通盼蠶接氤氳。明粢薦廣樂。陳奠嘉璧燎芳薪。膺寶圖執左契。德應天聖饗帝薦。表衷荷靈惠。壽萬年祚百世。

慶和

惟德動天有感必通。秉茲一德。禮於六宗。欽齋寶命。恭肅禮容。來顧來享。永穆皇風。天惟佑德。辟乃奉天。交感斯在。昭事罔愆。歲功已就。王道無偏。於焉報本。是用告虔。

慶順

聖皇戾止。天步舒遲。乾乾睿相。穆穆皇儀。進退必肅。陟降是祇。六變克協。萬靈協隨。

慶平

天命降監。帝德惟馨。享祀不忒。禮容孔明。奠璧布幣。薦神獻精。神祐以答。敷錫永寧。

羅紹威

紹威字端己。魏州貴鄉人。宏信之子。梁初官魏博節度使。封鄴王。入朝累拜太師兼中書令。諡

貞壯。

北夢瑣言。鄴王羅紹威喜文學。好儒士。癖于七言詩。江東羅隱爲錢鏐客。紹威中南阮之敬。隱以所著文章詩賦酬寄。紹威大傾慕之。乃目其所爲詩集曰偷江東。又有句云。樓前澹澹雲頭日。簾外蕭蕭雨腳風。今鄴中人士多

爲風

誦。

柳

妝點青春更有誰。青春常許占先知。亞夫營畔風輕處。元亮門前日暖時。花密宛如飄六出。葉繁何惜借雙眉。交情別緒論多少。好向行人贈一枝。

白菊

雖被風霜競欲催。皎然顏色不低摧。已疑素手能妝出。又似金錢未染來。香散自宜飄綠酒。葉交仍得蔭蒼苔。尋思閉戶中宵見。應認寒牕雪一堆。

王鎔

鎔成德節度使。庭湊之五世孫。中和中襲位。梁受禪。封趙王。後爲大將。張文禮所滅。五代史錄好左道。鍊丹藥。

求長生。與道士王若訥留遊西山。登王母祠。使婦維錦繡牽持而上。每出逾月忘歸。相傳有哭趙州和尚詩。

哭趙州和尚

師離灑水動王侯。心印光潛塵尾收。碧落霧縈松嶺月。滄溟浪覆濟人舟。一燈乍滅波旬喜。雙眼重昏道侶愁。縱是了然雲外客。每瞻餅几淚還流。

佛日西傾祖印墮。珠沈丹沼影沈輝。月敷丈室爐煙慘。風起禪堂松韻微。隻屐乍來留化跡。五天何處又逢歸。解空弟子絕悲喜。猶自潛然對雪幃。

孫偃

偃字龍光。武邑人。乾寧中宰相。仕梁。同中書門下平章事。封樂安公。五代詩話。偃曾乘輅至蜀。訪杜光庭。先生受籙。乃曰。嘗遇至人語及。

時事。每有高樓之約。爾後乃登宰輔。竟出家于南岳。有詩寄杜。其要句云。蜀國信難遇。楚鄉路更愁。我行同范滂。師舉劾浮邱。他日相逢處。多應在十洲。白馬驛之詞。惟儼免焉。

答門生王渙李德隣趙光允王拯長句

謬持文柄得時賢。粉署清華次第遷。昔歲策名皆健筆。今朝稱職並同年。各懷器業寧推讓。俱上青霄肯

後先何事老夫猶賦詠。欲將酬和永留傳。

贈南嶽僧全珙

窠居過後更何人。傳得如來法印真。昨日祝融峰下見。草衣便是雪山身。

李琪

琪字台秀。燉煌人。昭宗時舉進士。累官殿中侍御史。入梁爲翰林學士。末帝時。拜同中書門下平章事。入唐加太子少傅。

北夢瑣言。梁李相國琪。唐末以文學策名。仕至御史。昭宗播遷。衣冠蕩析。因與宏農楊玘。藏跡於荆楚間。楊卽濟蜀。琪相盤桓於夷道之清江。自晦其迹。號華原。李長官其堂。

兄光符。宰宜都。嘗厭薄之。琪相寂寞。每臨流。跋石摘樹葉。而試草制詞。吁嗟快恨。而投於水中。梁祖受禪。徵入拜翰林學士。尋登廊廟。爾後宜都之子彬。羈旅濟宮。因省相國。乃數斥父之所短而遺之。全唐詩話。琪有錄。僖宗幸蜀。旬云哀痛。

不下詔。登封誰上書。太平廣記曰。琪父佐王鐸。鐸。琪十三。鐸以漢祖三傑賦。題試之。大加稱獎。他日。纔角謁鐸。鐸曰。適蜀中詔到。用夏州拓跋思恭爲京北收復都統。可作一詩否。卽秉筆立製。鐸益奇之。執琪手曰。此真鳳毛也。

奉試詔用拓拔思恭爲京北收復都統

飛騎經巴棧。鴻恩及夏臺。將從天上去。人自日邊來。此處金門遠。何時玉輦迴。早平關右賊。莫待詔書催。

題廣愛寺楞伽上

善高天外遠。方丈海中遙。自有山神護。應無劫火燒。壞文侵古壁。飛劍出寒霄。何似蒼蒼色。嚴妝十七朝。

蕭頊

項莆田人官侍郎。梁初嘗同翁承贊爲册禮使使閩。梁末帝時拜同中書門下平章事。五代史梁征伐四方

所下詔書皆琪所爲。下筆輒得太祖意。與蕭瑄同爲末帝宰相。不相協。琪所私吏。尙得試官。改試爲守。爲瑄所發。末帝大怒。爲內侍趙慶等力救。乃罷爲太子少保。

### 贈翁承贊漆林書堂詩

輶車故國世應稀。昔日書堂二紀歸。手植松筠同茂盛。身榮金紫倍光輝。入門隣里喧迎接。列坐兒童見等威。卻對芸窗勤苦處。舉頭全是錦爲衣。

### 翁承贊

承贊字文堯。閩人。乾寧二年登進士第。又擢宏詞科。任京兆府參軍。天祐元年。以右拾遺受詔册王審知爲王。梁開平四年。復爲閩王册禮副使。尋擢諫議大夫。福建鹽鐵副使。就加左散騎常侍御史大夫。留相閩卒。所著有畫錦集。宏詞前後集。

竹窗雜錄。承贊後失節。爲梁諫議大夫。自號狎鷗翁。有詩集一卷。見唐書藝文志。并書博學宏詞前

後集共二十卷。俱軼不傳。予家取得册封閩王時律詩三十餘首。中多佳句。如窗含孤岫影。牧臥斷霞陰。早涼生戶牖。孤月照關河。參差雁陣天初碧。零落漁家蓼欲紅。長淮月上魚翻鬣。荒渚人稀鰓印蹄。松多舊日門人種。路是前朝釋子關。誠晚唐作手也。總龜俗云。槐花黃。舉子忙。翁承贊詩云。雨中粧點望中黃。勾引蟬聲送夕陽。憶得當年隨計吏。馬蹄終日爲君忙。乃知俗語亦有所自也。

### 晨興

晨起竹軒外。逍遙清興多。早涼生戶牖。孤月照關河。旅食甘藜藿。歸心憶薜蘿。一尊如有地。放意且狂歌。

題莒潭安園院

祧宗營祀舍。幽異勝珠林。名士穿雲訪。飛禽傍竹吟。牕含孤岫影。牧臥斷霞陰。景福滋閩壤。芳名亙古今。

訪建陽馬驛僧亞齊

蕭蕭風雨建陽溪。溪畔維舟訪亞齊。一軸新詩劍潭北。十年舊識華山西。吟魂惜向江村老。空性元知世路迷。應笑乘軺青瑣客。此時無暇聽猿啼。

題景祥院

一溪拖碧遶崔嵬。瓶鉢偏宜向此隈。農罷樹陰黃犢臥。齋時山下白衣來。松多往日門人種。路是前朝釋子開。三卷貝多金粟語。可能心煉得成灰。

寄舍弟承裕員外

江花岸草晚萋萋。公子王孫思合迷。無主園林饒採伐。忘情鷗鳥恣高低。長江月上魚翻鬣。荒圃人稀獭印蹄。何事斜陽再回首。休愁離別峴山西。

文明殿受冊封閩王

龍墀班聽漏聲長。竹帛昭勳撲御香。鳴佩洞庭辭帝主。登車故里冊閩王。一千年改江山瑞。十萬軍蒙雨露光。吟寄短篇追往事。留文功業不尋常。



御命歸鄉蒙賜錦衣

九重宣旨下丹墀。面對天顏賜錦衣。中使擎來三殿曉。寶箱開處五雲飛。德音耳聆君恩重。金印腰懸已力微。更待臨軒陳鼓吹。星輅便指故鄉歸。

天祐元年以右拾遺使册閩王而作

蓬萊宮闕曉光勻。紅案昇麻降紫宸。鸞奏八音諧律呂。鳳銜五色顯絲綸。蕭何相印鈞衡重。韓信齋壇雨露新。得侍丹墀官異寵。此身何幸沐恩頻。

晨興

鼓絕天街冷露收。曉來風景已堪愁。槐無顏色因經雨。菊有精神爲傍秋。自愛鮮飈生戶外。不教閑事住心頭。披襟徐步一蕭灑。吟繞盆池想狎鷗。

漢上登舟憶閩

漢臯亭畔起西風。半挂征帆立向東。久客自憐歸路近。算程不怕酒觴空。參差雁陣天初碧。零落漁家蓼欲紅。一片歸心隨去櫂。願言指日拜文翁。

對雨述懷示弟承檢

淋淋雲霧結秋霖。欲使秦城歎陸沈。曉勢遮回朝客馬。夜聲滴破旅人心。青苔重疊封顏巷。白髮蕭疎引越吟。不有惠連同此景。江南歸思幾般深。

華下霽後曉眺

結茅幽寂近禪林。霽景烟光著柳陰。千嶂華山雲外秀。萬重鄉思望中深。老嫌白髮還偷鑷。貧對春風亦強吟。花畔水邊人不會。騰騰閑步一披襟。

喜弟承檢登科

兩篇佳句敵瓊瑰。憐我三清道路開。荆璞獻多還得售。桂堂恩在敢輕回。花繁不怕尋香客。榜到應傾賀喜杯。知爾苦心功業就。早攜長策出山來。

蒙閩王改賜鄉里

鄉名文秀里光賢。別向鈞台造化權。閎闕使因今日貴。德音兼與後人傳。自從受賜身無力。向未酬恩骨肯鐫。歸闕路遙心更切。不嫌扶病倚旌旃。

奉使封閩王歸京洛

泥緘紫誥御恩光。信馬嘶風出洛陽。此去願言歸梓里。預憑魂夢展維桑。客程回首瞻文陛。驛路乘軺憶故鄉。指日還家堪自重。恩榮晝錦賀封王。

奉使封王次宜春驛

微宦淹留鬢已斑。此心長憶舊林泉。不因列土封千乘。爭得銜恩拜二天。雲斷自宜鄉樹出。月高猶伴客心懸。夜來夢到南臺上。徧看江山勝往年。

甲子歲銜命到家至榕城册封次日閩王降旌旗於新豐市堤餞別

登庸樓上方停樂。新市堤邊又舉杯。正是離情傷遠別。忽聞台旨許重來。此時暫與交親好。今日還將簡册回。爭得長房猶在世。縮教地近釣魚臺。

寄示兒孫

力學燒丹二十年。辛勤方得遇真仙。使隨羽客歸三島。旋聽霓裳適九天。得路自能酬造化。立身何必戀林泉。子家藥鼎分明在。好把仙方次第傳。

題壺山

井邑斜連北。蓬瀛直倚東。秋高巖溜白。日上海波紅。

題故居

一爲鴉子二蓮花。三望青湖四石斜。惟有嶺湖居第五。山前卻是宰臣家。

題槐

雨中妝點望中黃。句引蟬聲送夕陽。憶得當年隨計吏。馬蹄終日爲君忙。

擢進士

霓旌引上大羅天。別領新銜意自憐。蝴蝶流鶯莫先去。滿城春色屬羣仙。

擢探花使三首

洪崖差遣探花來。檢點芳叢飲數杯。深紫濃香三百朵。明朝爲我一時開。  
九重烟暖折槐芽。自是昇平好物華。今日始知春氣味。長安虛過四年花。  
探花時節日偏長。恬淡春風稱意忙。每到黃昏醉歸去。紵衣惹得牡丹香。

書齋漫興二首

池塘四五尺深水。籬落兩三般樣花。過客不須頻問姓。讀書聲裏是吾家。  
官事歸來衣雪埋。兒童燈火小茅齋。人家不必論貧富。惟有讀書聲最佳。

辭閩王歸朝寄倪先輩

時人莫訝再還鄉。簡冊分明劍佩光。駟馬高車太常樂。登庸門下憶賢良。

曉望

清霜散漫似輕嵐。玉闕參差萬象涵。獨上秦臺最高處。舊山依約在東南。

萬壽寺牡丹

爛熳香風引貴遊。高僧移步亦遲留。可憐殿角長松色。不得王孫一舉頭。

松

倚澗臨溪自屈蟠。雪花銷盡蘚花乾。幽枝好折爲談柄。入手方知有歲寒。

柳

斜拂中橋遠映樓。翠光駘蕩曉烟收。洛陽才子多情思。橫把金鞭約馬頭。  
高出營門遠出牆。朱闌門閉綠成行。將軍宴罷東風急。閑襯旌旗簇畫堂。  
彭澤先生酒滿船。五株栽向九江邊。長條細葉無窮盡。管領春風不計年。  
煬帝東遊意緒多。宮娃眉翠兩相和。一聲水調春風暮。千里交陰鎖汴河。  
纏繞春情卒未休。秦娥蕭史兩相求。玉句闌內朱簾卷。瑟瑟絲籠十二樓。  
春半烟深汴水東。黃金絲軟不勝風。輕籠行殿迷天子。拋擲長安似夢中。

狄歸昌

歸昌官侍郎。光化中歷尚書左丞。梁初卒。

題馬嵬驛

馬嵬煙柳正依依。重見鑾輿幸蜀歸。泉下阿蠻應有語。這回休更怨楊妃。

羅 衰

衰字子制。臨邛人。大順中歷左拾遺起居郎。仕梁爲禮部員外郎。

北夢瑣言。衰應舉。值喪亂。備歷飢寒。不歸。蜀王建致書中朝。求書記。衆欲

以衰應。衰曰。誓擁馬通火。服弊衣以俟升朝。無復西歸爲魯國東家邱也。後果如所願。唐音。戊籤韓全誨之誅。衰追理。劉寶策不果用。昭宗以弑崩。衰與蘓楷。駁諫號溢美。肆詆譭。議文出衰手。並希全忠旨也。事詳寶傳及哀紀。據言。羅隱

梁開平中累徵夕郎不起。衰以小天俸。  
大秋姚公使兩浙。衰以詩贈羅隱云。

贈羅隱

平日時風好流涕。讒書雖盛一名休。  
寰區歎屈瞻天問。夷貊聞詩過海求。  
向夕便思青瑣拜。近年尋伴赤松遊。  
何當世祖從人望。早以公台命卓侯。

清明尋水寺居

榆火輕煙處處新。旋從閑望到諸隣。  
浮生浮世祇多事。野水野花娛病身。  
濁酒不禁雲外景。碧峰猶冷寺前春。  
蓑衣毳衲誠吾黨。自結村園一社貧。

清明登奉先城樓

年來年去只艱危。春半堯山草尚衰。  
四海清平耆舊見。五陵寒食小臣悲。  
烟銷井邑隈樓檻。雪滿川原泥酒卮。  
拭盡賈生無限淚。一行歸雁遠參差。

于競

競仕梁。爲吏部侍郎。同中書門下兼翰林學士承旨。

圖畫見聞志。梁相國于競善畫牡丹。幼年從學。觀檻中牡丹盛開。乃命筆做之。不浹旬奪真矣。後遂酷思。

無倦。動必增奇。有人贈詩云。看時人步。盡展處蛙爭來。有寫生全本折枝傳于世。

瑯琊王祠碑銘

日月麗天。舟楫濟川。內外克乂。股肱惟賢。淮水長清。緱嶺方寧。慶隨祚遠。材爲時生。伯氏雄特。泉人仰德。求瘼斯勤。頒條有則。冠軍被疾。付以師律。政教翕張。士庶寧謐。懿被閩越。師實英傑。地列周封。心馳魏闕。聖澤汪洋。元戎啓行。有典有則。爲龍爲光。高懸秦鏡。理道自靜。比屋懷仁。連營稟令。航海梯山。貢奉循環。務其輸委。毋憚險艱。周征之術。公田什一。約以有程。守而勿失。輕徭薄賦。謳歌載路。高掩龔黃。遐追召杜。鄉校皆逝。童蒙來求。雅道靡靡。儒風優優。惟虺吹毒。久依山谷。罔恣陸梁。竟忻柔服。法寶梵宇。勝因所主。崇構斯精。福慶攸聚。佛齊諸國。綏之以德。架浪自東。驅山拱北。墜簡遺編。繕寫精研。麟臺蟲爾。武觀森然。春鏢其勤。雉堞連雲。永制爾敵。用壯我軍。關譏不稅。水陸無滯。遐邇懷來。商旅相繼。黃崎之勞。神改驚濤。役靈祇力。保千萬艘。劉驥荀龍。墳簾雍雍。維邦維翰。以侯以公。元帥梁王。武步龍驤。挺彼七德。削平四方。公能事大。推心斯在。風雨無渝。歲寒不改。殊助茂績。盡瘁宣力。國之丹青。邦之柱石。位冠台鼎。任隆兵柄。重以徽寵。分頒異姓。優詔銘功。萬古英風。貞珉是勒。垂之無窮。

王 瓚

瓚仕梁爲開封尹。

冬日與羣公泛舟焦山

江外水初凍。今年寒復遲。衆芳且未歇。近臘乃袂衣。載酒適我情。興來趣漸微。方舟大川上。環酌對落暉。

兩片青石稜。波際無因依。三山安可到。欲到風引歸。滄溟壯觀多。心目豁暫時。況得窮日夕。乘槎何所之。縱步不知遠。夕陽猶未回。好花隨處發。流水趁人來。

朱 褒

褒永嘉人。善屬詩文。值寇亂。據州以同姓結援。梁太祖奏授温州刺史。充靜海軍使。

悼楊氏妓琴弦

魂歸寥廓魄歸泉。只住人間十五年。昨日施僧裙帶上。斷腸猶繫琵琶弦。

劉 贊

贊桂陽人。宰相瞻之子。擢進士。仕梁。充崇政殿學士。

十國春秋。故唐宰相劉瞻者。李殷衡姊婿也。有子贊。幼孤。而性不慧。殷衡教之讀書。每督以筆。楚不進。

夕贊遁入嵩山。遇白衣叟語之曰。與汝開心。聰明必過人十倍。自是日誦一卷。兼有文藻。俄登進士第。梁時充崇政學士。猶數數念殷衡不忘。亦一異云。

贈羅隱

人皆言子屈。獨我謂君非。明主既難謁。青山何不歸。年虛侵雪鬢。塵枉污麻衣。自古逃名者。至今名豈微。

張 袞

袞 仕梁

梁郊祀樂章



烟燎昇禮容。徹誠感達人。神悅靈貺彰。聖情結玉座。寂金鑪。歎慶

和

恭祀上帝。于國之陽。爵禮是荷。鴻基永昌。

慶隆

導和氣兮襲氤氳。宣皇規兮彰聖神。服遐裔兮敷質文。格苗扈兮息烟塵。慶融

籩豆簠簋。黍稷非馨。懿茲彝器。厥德惟明。金石匏革。以和以平。由此無疆。期乎永寧。慶肅

哲后躬享。旨酒斯陳。王恭無斃。嚴祀惟寅。皇祖以配。大孝以振。宜錫景福。永休下民。慶熙

大業來四夷。仁風和萬國。白日體無私。皇天輔有德。七旬罪已服。六月師方克。偉哉帝道隆。終始常作則。慶休

### 李京

京梁貞明六年登第。

除夜長安作

長安朔風起。窮巷掩雙扉。新歲明朝是。故鄉何路歸。鬢絲饒鏡色。隰雪奪燈輝。卻羨秦州雁。逢春盡北飛。

### 戴司顏

司顏登大順進士第官太常博士梁初卒

據言景福中江西節度使鍾傳遣僧從約進法華經一千部上待之恩渥有加宣從約入內賜齋面錫紫衣一副將行太常博士戴

司顏以詩贈行略曰遠來朝鳳闕歸去戀元侯時吳子華任中諫司顏仰公之名志在屬和以爲從約之資融覽之拊掌大笑曰遮阿師更不要見便把拽出得其承奉如此矣

江上雨

非不欲前去此情非自由星辰照何處風雨送涼秋  
寒鎖空江夢聲隨黃葉愁蕭蕭猶未已早晚去蘋洲

塞上

空蹟晝蒼茫沙腥古戰場逢春多霰雪生計在牛羊  
冷角吹鄉淚乾榆落夢牀從來山水客誰謂到漁陽

褚載

載字厚之登乾寧進士第

紀事陸威爲郎官載以文投獻犯其家諱威因矍然載尋以賤致謝曰曹與之圖畫雖精終慚誤筆殷浩之矜持太過翻達空函海錄碎事載有句云相逢多是醉醺然應

有囊中子母錢又云有興欲沽紅麴酒無人同上翠旌樓又月詩云星斗離披燿靄收玉蟾蜍耀海東頭又送道士云鹿胎冠子水晶簪長嘯歌眠紫桂陰又云蹙蹙馬搖金絡腦嬋娟人墜玉搔頭又云狂歌放飲渾成性知道逍遙出俗籠又云除卻洛陽才子賈更誰封恨弔懷沙又云蓮浦浪澄堪倚釣柳堤風暖好垂鞭又少年行云上馬等閒銷白日出門輕薄倚黃金

投節度邢公

西風昨夜墜紅蘭一宿郵亭事萬般無地可耕歸不得  
有恩堪報死何難流年怕老看將老百計求安未

得安一卷新書滿懷淚。頻來門館訴饑寒。

詩史載家至貧。客梁宋間。困甚。以詩投襄陽節度使邢君牙云。君牙贈絹十疋。薦于鄭滑辟支使。不行。明年。裴贄知貢舉。君牙薦之。擢第。

賀趙觀文重試及第

唐音戊籤。案文乾寧二年。崔凝下第八人登第。是年命陸辰重試。而觀文爲榜首。事詳王貞白下。

一枝仙桂兩回春。始覺文章可致身。已把色絲要上第。又將彩筆冠羣倫。龍泉再淬方知利。火浣重燒轉更新。人日街頭看御榜。大能榮耀苦心人。

贈道士

簪星曳月下蓬壺。曾見東臯種白榆。六甲威靈藏瑞檢。五龍雷電遶霜都。惟教鶴探丹邱信。不使人窺太乙爐。聞說葛陂風浪惡。許騎青鹿從行無。

城鼎臣

邾鄆城高門倚天。九重蹤蹟尙依然。須知道德無關鎖。一閉乾坤一萬年。

陳倉驛

錦翼花冠安在哉。雄飛雌伏盡塵埃。一雙童子應惆悵。不見真人更獵來。

長城

秦築長城比鐵牢。蕃戎不敢過臨洮。焉知萬里連雲色。不及堯階三尺高。

弔秦叟

市西樓店金千稱。渭北田園粟萬鍾。兒被殺傷妻被虜。一身隨駕到三峯。

雲

盡日看雲首不回。無心都大似無才。可憐光彩一片玉。萬里晴天何處來。

鶴

欲洗霜翎下澗邊。卻嫌菱刺污香泉。沙鷗浦雁應驚訝。一舉扶搖直上天。

趙光遠

光遠華州刺史。隲之子。不第終。韋莊奏贈官。

咏手二首

妝成皓腕洗凝脂。背接紅巾掬水時。薄霧袖中拈玉笋。斜陽屏上撚青絲。喚人急拍臨前檻。摘杏高揜近曲池。好是琵琶弦畔見。細圓無節玉參差。

撚玉搓瓊軟復圓。繡窗誰見上琴弦。慢籠彩筆閑書字。斜指瑤階笑打錢。爐面試香添麝炷。舌頭輕點貼金鈿。象床珍簟宮棋處。拈定文楸占角邊。

題妓萊兒壁

魚鑰獸環斜掩門。萋萋芳草憶王孫。醉凭青瑣窺韓壽。閑擲金梭惱謝鯤。不夜珠光連玉匣。辟寒釵影落瑤尊。欲知腸斷相思處。役盡江淹別後魂。

孫 榮

榮字文威。歷官御史。翰林學士。中書舍人。梁初不仕。自號無爲居士。著有北里志。

全唐詩話。榮嘗云。泰娘北曲內。

小家中門前一樗樹。年齒甚妙。粗有容色。以居非其所。人不知之。余過其舍。題詩云。同遊聞之。詰朝詣之者。結駟于門矣。詩云。尋常凡木最輕樗。今日尋樗桂不如。漢高新破咸陽後。英俊奔波遂喫虛。

贈妓人王福娘

綵翠仙衣紅玉膚。輕盈年在破瓜初。霞杯醉勸劉郎賭。雲髻慵邀阿母梳。不怕寒侵緣帶寶。每憂風舉倩持裾。謾圖西子晨粧樣。西子元來未得如。

題北里妓人壁

移壁迴窗費幾朝。指鑽偷解博紅椒。無端鬪草輸鄰女。更被拈將玉步搖。寒繡衣裳餉阿嬌。新團香獸不禁燒。東鄰起樣裙腰闊。剩蹙黃金線幾條。試共卿卿語笑初。畫堂連遣侍兒呼。寒肌不耐金如意。白癩爲膏郎有無。

戲李文遠

引君來訪洞中仙。新月如眉拂戶前。領取嫦娥攀取桂。便從陵谷一時遷。



# 全五代詩卷二

梁

杜荀鶴

荀鶴字彥之。池州人。有詩名。自號九華山人。大順二年第一人擢第。復還舊山。宣州田頔遣至。沐通好。朱全忠厚遇之。表授翰林學士。主客員外郎。制誥卒。自序其文。爲唐風集十卷。

洞微志  
荀鶴詩

梁高祖忽無雲而雨。溫曰。無雲而雨。謂之天泣。不知何祥。請賦詩。荀鶴曰。同是乾坤事不同。雨絲飛灑日輪中。若教陰顯都相似。爭表梁王造化工。溫喜之。輟耕錄。荀鶴詩。遇亂云。握手相看誰敢言。云云。今日始信其非寓言也。宣和書譜。荀鶴詩。辭句切理。有舉鞭揮柳色。隨手夫蟬聲之句。爲詩人所稱。書有譜唐風。後村詩話。荀鶴詩。欺春祇愛和醅酒。譚老猶看夾注書。放翁云。膽薄沾官釀。醉昏讀監書。二聯佳句。捫蝨新話。荆公常讀荀鶴詩云。江湖不見飛禽影。岩谷惟聞折竹聲。改云。宜作禽飛竹折。唐詩紀事。荀鶴有句云。舊衣灰絮絮。新酒竹篔簹。又有句云。風暖鳥聲碎。日高花影重。又曉來山鳥鬧。雨過杏花稀。皆佳句也。顧雲序略云。生及第之明年。寧親江表。以僕故山僧隱者。出詩三百篇見簡。其雅麗清省激越之句。能使貪吏廉。邪臣正。父慈子孝。兄弟弟悌。人倫之紀備矣。其壯語大言。則決起逸發。可以左攬工部。袂右拍翰林肩。吞賈喻八九於胸中。曾不帶介。或情動於中。則極思冥搜。神遊希夷。形兀枯木。五聲勞於呼吸。萬象貧於抉剔。信詩之雄傑者也。方回云。荀鶴律詩。多是領聯作一串。頸聯體物。唐音戊籤。荀鶴以正月初十日生。登第于大順二年。時已四十六歲。放榜亦正月初十日也。故王希羽贈詩。有金榜曉懸生世日。玉書潛記上昇時之句。或云荀鶴實

杜紫薇之子。紫薇會昌末。自齊安移  
守秋浦時。妾有姪。出嫁杜筠而生云。

春宮怨

早被嬋娟誤。欲妝臨鏡慵。承恩不在貌。教妾若爲容。  
風暖鳥聲碎。日高花影重。年年越溪女。相憶採芙蓉。

贈廬嶽隱者

自見來如此。未嘗離洞門。結茅遮雨雪。採藥給晨昏。  
古樹藤纏殺。春泉鹿過渾。悠悠無一事。不似屬乾坤。

題會上人院

鼓角城中寺。師居日得閑。必能行大道。何用在深山。  
破衲新添線。空門夜不關。心知與眼見。終取到無間。

送黃補闕南遷

得罪非天意。分明謫去身。一心貪諫主。開口不防人。  
自古有遷客。何朝無直臣。喧然公論在。難滯楚南春。

送賓貢登第後歸海東

歸捷中華第。登船鬢未絲。直應天上桂。別有海東枝。  
國界波窮處。鄉心日出時。西風送君去。莫慮到家遲。

近試投所知

白髮隨梳落。吟懷說向誰。敢辭成事晚。自是出山遲。  
擬動如浮海。凡言似課詩。終身事知己。此外復何爲。

送友人牧江州



本國兵戈後，難官在此時。遠分天子命，深要使君知。但遂生靈願，當應雨露隨。江山勝他郡，閑賦庾樓詩。

辭座主侍郎

一飯尚懷感，況攀高桂枝。此恩無報處，故國遠歸時。祇恐兵戈隔，再趨門館遲。茅堂拜親後，特地淚雙垂。

別從叔

立馬不忍上，醉醒天氣寒。都緣在門易，直似別家難。世路既如此，客心須自寬。江村亦飢凍，爭及問長安。

送人南遊

凡遊南國者，未有不蹉跎。到海路難盡，挂帆人更多。潮沙分象跡，花洞響蠻歌。縱有投文處，於君能幾何。

經賈島墓

謫宦自麻衣，銜冤至死時。山根三尺墓，人口數聯詩。仙桂終無分，皇天似有私。暗松風雨夜，空使老猿悲。

送舍弟

我受羈棲慣，客情方細知。好看前路事，不比在家時。勉汝言須記，聞人善卽師。旅中無廢業，時作一篇詩。

將歸山逢友人

洞春詩話唐人虛字押韻如元正薄命知然也深交有以乎陳思濶角勝非能者推賢見射乎杜荀鶴云。

儒爲君子儒，儒道不妨孤。白髮多生矣，青山可住乎。徉狂寧是事，巧達又非夫。祇此平生願，他人肯信無。

經九華費徵君墓

凡弔先生者，多傷荆棘間。不知三尺墓，高卻九華山。天地有何外，子孫無亦閑。當時若徵起，未必得身還。

與友人對酒吟

憑君滿酌酒，聽我醉中吟。客路如天遠，侯門似海深。新墳侵古道，白髮戀黃金。共有人間事，須懷濟物心。

送九華道士遊茅山

忽起地仙興，飄然出舊山。於身無切事，在世有餘閑。日月浮生外，乾坤大醉間。故園華表上，誰得見君還。

寄舍弟

世亂信難通，鄉心日萬重。弟兄皆嚮善，天地合相容。大野陰雲重，連城殺氣濃。家山白雲裏，臥得最高峰。

下第投所知

若以名場內，誰無一軸詩。縱饒生白髮，豈敢怨明時。知己雖然切，春官未必私。寧教讀書眼，不有看花期。

寄顧雲

省得前年別，蘋洲旅館中。亂離身不定，彼此信難通。侯國兵雖斂，吾鄉業已空。秋來憶君夢，夜夜逐征鴻。

望遠

門前通大道，望遠上高臺。落日人行盡，窮邊信不來。還聞戰得勝，未見敕招回。卻入機中坐，新愁織不開。

冬末投長沙裴侍郎

欲露塵中事，其如不易言。家山一離別，草樹匝春暄。吹夢風天角，啼愁雪嶽猿。佇思心覺滿，何以遠門軒。

贈秋浦金明府長

倚郭難爲宰，非君卽有私。惟憑野老口，不立政聲碑。苦甚求名日，貧於未選時。溪山竟如此，利得且吟詩。

亂後山中作

自從天下亂，日晚別庭闈。兄弟團圞樂，羈孤遠近歸。文章甘世薄，耕種喜山肥。直待中興後，方應出隱扉。

旅寓書事

日日驚身事，悽悽欲斷魂。時清不自立，髮白傍誰門。中路殘秋雨，空山一夜猿。公卿得見面，懷抱細難言。

長林山中聞賊退寄孟明府

一縣今如此，殘民數不多。也知賢宰切，爭柰亂兵何。皆自干戈達，咸思雨露和。應憐住山者，頭白未登科。

泗上客思

痛飲復高歌，愁終不奈何。家山隨日遠，身事逐年多。沒雁雲橫楚，兼蟬柳夾河。此心閑未得，到處被詩磨。

寄同人

盡與貧爲患，唯余卽不然。四方無靜處，百口度荒年。白髮生閑事，新詩出數聯。時情竟如此，不免卻歸田。

下第出關投鄭拾遺

丹霄桂有枝，未折未爲遲。況是孤寒士，兼行苦澀詩。杏園人醉日，關路獨歸時。更卜深知意，將來擬薦誰。

別敬侍郎

交道有寒暑。在人無古今。與君中夜話。盡我一生心。所向未得志。豈惟空解吟。何當重相見。舊隱白雲深。

送青陽李明府

善政無慙色。吟歸似等閑。惟將六幅絹。寫得九華山。求理頭空白。離京債未還。仍聞猿與鶴。都在一船間。

將遊湘湖有作

一家相別意。不得不漻然。遠作南方客。初登上水船。嶽鍾思冷夢。湘月少殘篇。便有歸來計。風波亦隔年。

送姚庭珪

脫衣將換酒。對酌話何之。雨後秋蕭索。天涯晚別離。人生無此恨。鬢色不成絲。未得重相見。看君馬上詩。

貽里中同志

鄉里爲儒者。唯君見我心。詩書常共讀。雨雪亦相尋。貧賤志氣在。子孫交契深。古人猶晚達。況未鬢霜侵。

江上送韋叅先輩

不易爲離抱。江天卽見鴻。暮帆何處落。涼月與誰同。木葉新霜後。漁燈夜浪中。時難慎行止。吾道利于窮。

維揚逢詩友張喬

天下方多事。逢君得話詩。直應吾道在。未覺國風衰。生計吟消日。人情醉過時。雅篇三百首。留作後來師。

秋晨有感

木葉落時節。旅人初夢驚。鐘才枕上盡。事已眼前生。吟髮不長黑。世交無久情。且將公道約。未忍便歸耕。

秋日山中寄李處士

吾輩道何窮。寒山細雨中。兒童書懶讀。果栗樹將空。言論關時務。篇章見國風。昇平猶可用。應不廢爲公。

山中貽同志

君貧我亦貧。爲善喜爲隣。到老如今日。無心媿古人。閉門非傲世。守道是謀身。別有同山者。其如未可親。

秋日懷九華舊居

吾道在五字。吾身寧陸沈。涼生中夜雨。病起故山心。燭共寒酸影。蛩添苦楚吟。何當遂歸去。一徑入松林。

經青山弔李翰林

何爲先生死。先生道日新。青山明月夜。千古一詩人。天地空銷骨。聲名不傍身。誰移未陽冢。來此作吟隣。

送人宰吳縣

海漲兵荒後。爲官合動情。字人無異術。至論不知清。草履隨船賣。綾梭隔水鳴。唯持古人意。千里贈君行。

讀友人詩

君詩通大雅。吟覺古風生。外卻浮華景。中含教化情。名應高日月。道可潤公卿。莫以孤寒恥。孤寒達更榮。

辭九江李郎中入關

帝里無相識。何門跡可親。願開言重口。薦與分深人。卷許新詩出。家憐舊業貧。今從九江去。應免更迷津。

江南逢李先輩

李杜復李杜。彼時逢此時。干戈侵帝里。流落向天涯。歲月消於酒。平生斷在詩。懷才不得志。祇恐滿頭絲。

秋日寄吟友

閑坐細思量。唯吟不可忘。食無三畝地。衣絕一株桑。蟬樹生寒色。漁潭落曉光。青雲舊知己。未許釣滄浪。

江上與從弟話別

相逢盡說歸。早晚遂歸期。流水多通處。孤舟少住時。干人不得已。非我欲爲之。及此終無媿。其如道在茲。

送友人遊南海

南海南邊路。君遊祇爲貧。山川多少地。郡邑幾何人。花鳥名皆別。寒暄氣不均。相期早晚見。莫待瘴侵身。

贈聶尊師

詩道將仙分。求之不可求。非關從小學。應是數生修。蟾桂雲梯折。鰲山鶴駕遊。他年兩成事。堪喜是隣州。

旅感

白髮根叢出。鑷頻愁不開。自憐空老去。誰信苦吟來。客路東西闊。家山早晚回。翻思釣魚處。一雨一層苔。

寄益陽武灌明府

縣稱詩人理。無嫌日寂寥。溪山入城郭。戶口半漁樵。月滿彈琴夜。花香漉酒朝。相思不相見。烟水路迢迢。

湘中秋日呈所知

四海無寸土。一生惟苦吟。虛垂思鄉淚。不滴別人心。雨色凋湘樹。灘聲不塞禽。求歸歸未得。不是擲光陰。

閩中別所知

觸目生歸思。那堪路七千。臘中離此地。馬上見明年。郡邑溪山巧。寒暄日月偏。自疑雙鬢雪。不似到南天。

哭友人

病向名場得。終爲善誤身。無兒承後嗣。有女托何人。葬禮難求備。交情好者貧。惟餘舊文集。一覽一沾巾。

新栽竹

斲破蒼苔色。因栽十數莖。窗風從此冷。詩思當時清。酒入杯中影。棋添局上聲。不同桃與李。瀟灑伴書生。

送吳蛻下第入蜀

下第言之蜀。那愁舉別杯。難兄方在幕。上相復憐才。鳥徑盤春靄。龍湫發夜雷。臨邛無久戀。高桂待君回。

亂後歸山

亂世歸山谷。征聲喜不聞。詩書猶滿架。弟姪未爲軍。山犬眠紅葉。樵童唱白雲。此心非此志。終擬致明君。

題著禪師

大道本無幻。常情自有魔。人皆迷著此。師獨悟如何。爲岳開窗闊。因蟲長草多。說空空說得。空得到維摩。

春日閑居卽事

未得青雲志。春同秋日情。花開如葉落。鶯語似蟬鳴。道合和貧守。詩堪與命爭。飢寒是吾事。斷定不歸耕。

亂後再逢汪處士

如君真道者。亂世有閑情。每別不知處。見來長後生。藥非因病服。酒不爲愁傾。笑我於身苦。吟髭白數莖。

山中喜與故交宿話

遠地能相訪。何慙事力微。山中深夜坐。海內故交稀。村酒沾來濁。溪魚釣得肥。貧家只如此。未可便言歸。

觀棋

對面不相見。用心同用兵。算人常欲殺。顧己自貪生。得勢侵吞遠。乘危打劫贏。有時逢敵手。當局到深更。

送人宰德清

亂世人多事。耕桑或失時。不聞寬賦斂。因此轉流離。天意未如是。君心無自欺。能依四十字。可立德清碑。

寄竇處士

漳水醉中別。今來猶未醒。半生因酒廢。大國幾時寧。海畔將軍柳。天邊處士星。遊人不可見。春入亂山青。

題歷山舜祠

山有廟。呼爲帝二子。多變妖異。爲時所敬。

昔舜曾耕地。遺風日寂寥。世人那肯祭。大聖不興妖。殿宇秋霖壞。杉松野火燒。時訛競淫祀。絲竹醉山魈。

和吳太守罷郡山村偶題二首

罷郡饒山興。村家不惜過。官情隨日薄。詩思入秋多。野獸眠低草。池禽浴動荷。眼前餘政在。不似有干戈。

快活田翁輩。常言化育時。縱饒稽歲月。猶說向孫兒。茅屋梁和節。茶盤果帶枝。相傳終不忘。何必立生祠。



亂後送友人歸湘中

家枕三湘岸。門前卽釣磯。漁竿壯歲別。鶴髮亂時歸。岳暖無猿叫。江春有燕飛。平生書劍在。莫使學忘機。

送紫陽僧歸廬岳舊寺

紫衣明主贈。歸寺感先師。受業恩難報。開堂影不知。松風欹枕夜。山雪下樓時。此際無人會。微吟復斂眉。

塞上傷戰士

戰士說辛勤。書生不忍聞。三邊遠天子。一命信將軍。野火燒人骨。陰風捲陣雲。其如禁城裏。何以重要勳。

春日訪獨孤處士

地僻春來靜。深宜長者居。好花都待晚。修竹不妨疎。雁入湘江食。人侵曉色鋤。似君無學處。頭白道如初。

秋宿棲賢寺懷友人

一宿三秋寺。閑忙與曉分。細泉山半落。孤客夜深聞。鶴去巢盛月。龍潛穴擁雲。苦吟方見景。多恨不同君。

訪道者不遇

寂寂白雲門。尋真不遇真。祇應松上鶴。便是洞中人。藥圃花香異。沙泉鹿跡新。題詩留姓字。他日此相親。

送人遊吳

君到姑蘇見。人家盡枕河。古宮閑地少。水港小橋多。夜市賣菱藕。春船載綺羅。遙知未眠月。鄉思在漁歌。

送陳師歸麻川

麻川清見底。似入武陵溪。兩岸山相向。三春鳥亂啼。酒旗和柳動。僧屋與雲齊。卽此吾鄉路。懷君夢不迷。

出山

病眼看春勝。文場公道開。朋人登第盡。白髮出山來。處世曾無過。惟天合是媒。長安不覺遠。期遂一名迴。

浙中逢詩友

到處有同人。多爲賦與文。詩中難得友。湖畔喜逢君。凍把城根雪。風開嶽面雲。苦吟吟不足。爭忍話離羣。

送友遊吳越

去越從吳過。吳疆與越連。有園多種橘。無水不生蓮。夜市橋邊火。春風寺外船。此中偏重客。君去必經年。

出常山界使回有寄

自小卽南北。未如今日離。封疆初盡處。人使卻回時。開口有所忌。此心無以爲。行行復垂淚。不見是男兒。

經廢宅

人生當貴盛。修德可延之。不慮有今日。爭教無破時。蘚斑題字壁。花發帶巢枝。何況蒿原上。荒墳與折碑。

登天台寺

一到天台寺。高低景旋生。共僧巖上坐。見客海邊行。野色人耕破。山根浪打鳴。忙時向閑處。不覺有閑情。

途中春

馬上覽春色。丈夫慙淚垂。一生看卻老。五字未逢知。酒力不能久。愁根無可醫。明年到今日。公道與誰期。

入關歷陽道中卻寄舍弟

求名日苦辛。日望日榮親。落葉山中路。秋霖馬上人。晨昏知汝道。詩酒衛吾身。自笑拋麋鹿。長安擬醉春。

贈歐陽明府

賢宰宰斯邑。政聞閭里間。都緣民訟少。長覺吏徒閑。帆落樽前浦。鐘鳴枕上山。回舟卻惆悵。數宿釣魚灣。

贈臨上人

不計禪兼律。終須入悟門。解空非有自。所得是無言。眼豁浮生夢。心澄大道源。今來習師者。多鑣教中猿。

題戰島僧居

在江之心

師愛無塵地。江心島上居。接船求化慣。登陸赴齋疎。載土春栽樹。拋生日餒魚。入雲蕭帝寺。畢竟欲何如。

別衡州牧

朝別使君門。暮投江上村。從來無舊分。臨去望何恩。行計自不定。此心誰與論。秋猿叫寒月。祇欲斷人魂。

送人遊江南

滿酌勸君酒。勸君君莫辭。能禁幾度別。卽到白頭時。晚岫無雲蔽。春帆有燕隨。男兒兩行淚。不欲等閑垂。

遊茅山

步步入山門。仙家鳥徑分。漁樵不到處。麋鹿自成羣。石面迸出水。松頭穿破雲。道人星月下。相次禮茅君。

讀友人詩卷

冰齒味瑤軸。祇應神鬼知。坐當羣靜後。吟到月沈時。雪峽猿聲健。風檉鶴立危。篇篇一字字。誰復更言詩。

寄從叔

三族不當路。長年猶布衣。苦吟天與性。直道世將非。雁夜愁癡坐。漁鄉老憶歸。爲儒皆可立。自是拙時機。

寄李溥

如我如君者。不妨身晚成。但從時輩笑。自得古人情。共莫更初志。俱期立後名。男兒且如此。何用歎平生。

郊居卽事投李給事

無祿奉晨昏。閑居幾度春。江湖苦吟士。天地最窮人。書劍同三友。蓬蒿外四隣。相知不相薦。何以自謀身。

寄詩友

別來春又春。相憶喜相親。與我爲同志。如君能幾人。何時吟得力。漸老事關身。惟有前溪水。年年濯客塵。

題田翁家

田翁真快活。婚嫁不離村。州縣供輸罷。追隨鼓笛喧。盤殮同老少。家計共田園。自說身無事。應官有子孫。

長安冬日

近臘饒風雪。閑房凍坐時。書生教到此。天意轉難知。吟苦猿三叫。形枯柏一枝。還應公道在。未忍與山期。

霽後登唐興寺水閣

一雨三秋色。蕭條古寺間。無端登水閣。有處似家山。白日生新事。何時得暫閑。將知老僧意。未必戀松關。

山中寄友人

深山多隙地。無力及耕桑。不是營生拙。都緣覓句忙。破窗風翳燭。穿屋月侵牀。吾友應相笑。辛勤道未光。

自述

四海欲行遍。不知終遇誰。用心常合道。出語或傷時。擬作閑人老。慙無識者嗤。如今已無計。祇得苦于詩。

題江山寺

江上山頭寺。景留吟客船。遍遊銷一日。重到是何年。沙鳥多翹足。巖僧半露肩。爲詩多語澀。喜此得終篇。

秋日旅舍臥病呈所知

秋色上庭枝。愁懷切向誰。青雲無勢日。華髮有狂時。枕上聞風雨。江南繫別離。如何吟到此。此道不聞知。

秋宿山館

山館坐待曉。夜長吟役神。斜風吹敗葉。寒燭照愁人。蘊蓄天然性。澆訛世惡真。男兒出門志。不獨爲謀身。

贈老僧

衆僧尊夏臘。靈嶽遍曾登。度水手中杖。行山溪畔藤。心空默是印。眉白雪爲稜。自得巡方道。棲禪老未能。

別舍弟

欲住住不得。出門天氣秋。惟知偷拭淚。不忍更回頭。此日祇愁老。況身方遠遊。孤寒將五字。何以動諸侯。

雪中別詩友

酒寒無小戶。請滿酌行杯。若待雪消去。自然春到來。出城人跡少。向暮鳥聲哀。未遇應關命。侯門處處開。

題嶽麓寺

一簇楚江山。江山勝此難。覓人來畫取。到處得吟看。鶴隱松聲盡。魚沈檻影寒。自知心未了。閑話亦多端。

懷廬嶽書齋

長憶在廬嶽。免低塵土顏。煮茶窗底水。採藥屋頭山。是境皆遊遍。誰人不羨閑。無何一名繫。引出白雲間。

題唐興寺小松

雖小天然別。難將衆木同。侵僧半窗月。向客滿襟風。枝拂行苔鶴。聲分叫砌蟲。如今未堪看。須是雪霜中。

與友人話別

客路行多少。千人無易顏。未成終老計。難致此身閑。月兔走入海。日鳥飛出山。流年留不得。半在別離間。

和劉評事送海禪和歸山

衲外元無象。言尋那路尋。問禪將底說。傳印得何人。未了羣山淺。難休一室深。伏魔寧是獸。巢頂亦非禽。觀色風驅霧。聽聲雪灑林。凡歸是歸處。不必指高岑。

御溝柳

律到御溝春。溝邊柳色新。細籠穿禁水。輕拂入朝人。日近韶光早。天低聖澤勻。谷鶯棲未穩。宮女畫難真。

楚國空搖浪，隋堤暗惹塵。如何帝城裏，先得覆龍津。





全五代詩卷三

梁

杜荀鶴三

寄温州朱尚書并呈軍倅崔太博

朱名褒，以同姓結援梁太祖。奏授温州刺史，充靜海軍使。

永嘉名郡昔推名，連屬荀家弟與兄。  
教化靜師襲渤海，篇章高體謝宣城。  
山從海岸妝吟景，水自城根演政聲。  
今日老輸崔博士，不妨疎逸伴雙旌。

贈李鐔

鐔自維揚遇亂，東入山中。

君行君文天合知，見君如此我興悲。  
祇殘三口兵戈後，纔到孤村雨雪時。  
著臥衣裳難辦洗，旋求糧食莫供炊。  
地爐不暖柴枝溼，猶把蒙求授小兒。

冬末同友人泛瀟湘

殘臘泛舟何處好，最多吟興是瀟湘。  
就船買得魚偏美，踏雪沽來酒倍香。  
猿到夜深啼嶽麓，雁知春近別衡陽。  
與君剩採江山景，裁取新詩入帝鄉。

旅中臥病

全五代詩 卷三

秋來誰料病相縈。枕上心猶算去程。風射破窗燈易滅。月穿疎屋夢難成。故園何啻三千里。新雁纔聞一兩聲。我自與人無舊分。非干人與我無情。

贈秋浦張明府

君爲秋浦三年宰。萬慮關心兩鬢知。人事旋生當路縣。吏才難展用兵時。農夫背上題軍號。賈客船頭插戰旗。他日親知問官況。但教吟取杜家詩。

雪

風攪長空寒骨生。光於曉色報窗明。江湖不見飛禽影。巖谷時聞折竹聲。巢穴幾多相似處。路歧兼得一般平。擁袍公子休言冷。中有樵夫跣足行。

題廬嶽劉處士草堂

仙境閑尋採藥翁。草堂留話一宵同。若看山下雲深處。直是人間路不通。泉領藕花來洞口。月將松影過溪東。求名心在閑難遂。明日馬蹄塵土中。

秋宿臨江驛

南來北去二三年。去年來兩鬢斑。舉世盡從愁裏老。誰人肯向死前閑。漁舟火影寒歸浦。驛路鈴聲夜過山。身事未成歸未得。聽猿鞭馬入長關。

重陽日有作

一爲重陽上古臺。亂時誰見菊花開。偷攀白髮真堪笑。牢鑠黃金實可哀。是箇少年皆老去。爭知荒塚不榮來。大家拍手高聲唱。日未沈山且莫迴。

送李鐔遊新安

邯鄲李鐔才崢嶸。酒狂詩逸難千名。氣直不與兒輩洽。醉來擬共天公爭。孤店夜燒枯葉坐。亂時秋踏早霜行。一間茅屋居不穩。剛出爲人平不平。

亂後山居

從亂移家擬傍山。今來方辦買山錢。九州有路休爲客。百歲無愁卽是仙。野叟並田鋤暮雨。溪禽同石立寒煙。他人似我還應少。如此安貧亦荷天。

夏日登友人書齋林亭

暑天長似秋天冷。帶郭林亭畫不如。蟬噪檻前遮日竹。鷺窺池面弄萍魚。拋山野客橫琴醉。種藥家僮踏雪鋤。衆惜君才堪上第。莫因居此與名疎。

春日山居寄友人

野吟何處最相宜。春景暄和好入詩。高下麥苗新雨後。淺深山色晚晴時。半巖雲腳風牽斷。平野花枝鳥踏垂。倒載干戈是何日。近來麋鹿欲相隨。

懷廬嶽舊隱

一別三年長在夢。夢中時躡石稜層。泉聲入夜方堪聽。山色逢秋始好登。巖鹿慣隨鋤藥叟。溪鷗不怕洗苔僧。人間有許多般事。求要身閑直未能。

春日登樓遇雨

忽地晴天作雨天。全無暑氣似秋間。看看水沒來時路。漸漸雲藏望處山。風趁鷺鷥雙出葦。浪催漁父盡歸灣。一心準擬閑登眺。卻被詩情使不閑。

春日行次錢塘卻寄台州姚中丞

豈爲無心求上第。難安帝里爲家貧。江南江北閑爲客。潮去潮來老卻人。兩岸雨收鶯語柳。一樓風滿角吹春。花前不獨垂鄉淚。曾是朱門寄食身。

贈友人罷舉赴交趾辟命

罷卻名場擬入秦。南行無罪似流人。縱經商嶺非馳驛。須過長沙弔逐臣。舶載海奴鑼磬耳。象駝蠻女綵纏身。如何待取丹霄桂。別赴嘉招作上賓。

時世吟

夫因兵死守蓬茅。麻苧衣衫鬢髮焦。桑柘廢來猶納稅。田園荒後尙徵苗。時挑野菜和根煮。旋斫生柴帶葉燒。任是深山更深處。也應無計避征徭。

閑居書事

竹門茅屋帶村居。數畝生涯自有餘。鬢白祇因秋鍊句。眼昏多爲夜抄書。雁驚風浦漁燈動。猿叫霜林橡實疎。待得功成卽西去。時清不問命何如。

亂後逢村叟

經亂衰翁居破村。村中何事不傷魂。因供寒木無桑柘。爲點鄉兵絕子孫。還似平寧徵賦稅。未嘗州縣略安存。至今雞犬皆星散。日落前山獨倚門。

贈元上人

多少僧中僧行高。偈成流落遍僧抄。經窗月靜灘聲到。石逕人稀蘚色交。垂露竹粘蟬落殼。牽雲松載鶴棲巢。煮茶童子閑勝我。猶得依時把磬敲。

夏日留題張山人林亭

此中偏稱夏中遊。時有風來暑氣收。澗底松搖千尺雨。庭中竹撼一窗秋。求猿句寄山深寺。乞鶴書傳海畔洲。閑與先生話身事。浮名薄宦總悠悠。

傷病馬

此馬堪憐力壯時。細勻行步恐塵知。騎來未省將鞭觸。病後長教覓藥醫。顧主強擡和淚眼。就人輕刷帶瘡皮。祇今筋骨渾全在。春暖莎青放未遲。

送僧赴黃山沐湯泉兼參禪宗長老

聞有湯泉獨去尋。一餅一鉢一無金。不愁亂世兵相害。卻喜寒山路入深。野老禱神鷄噪廟。獵人衝雪鹿驚林。患身是幻逢禪主。水洗皮膚語洗心。

獻鄭給事

化行邦域二年春。樵唱漁歌日日新。未降詔書酬善政。不知天澤答何人。秋登嶽寺雲隨步。夜宴江樓月滿身。他日朱門恐難掃。沙堤新築必無塵。

中山臨上人院觀牡丹寄諸從事

閑來吟遶壯丹叢。花豔人生事略同。半雨半風三月內。多愁多病百年中。開當韶景何妨好。落向僧家卽是空。一境別無唯此有。忍教醒坐對支公。

塞上

旌旗鬣鬣漢將軍。閑出巡邊帝命新。沙塞旋收饒帳幙。犬戎時殺少煙塵。冰河夜渡偷來馬。雪嶺朝飛獵去人。獨作書生疑不穩。軟弓輕劍也隨身。

戲題王處士書齋

先生高興似樵漁。水鳥山猿一處居。石徑可行苔色厚。釣竿時斫竹叢疎。欺春祇愛和醅酒。諱老猶看夾注書。莫道無金空有壽。有金無壽欲何如。

長安道中有作

回頭不忍看羸僮。一路行人我最窮。馬跡蹇於槐影裏。釣船拋在月明中。帽簷曉滴淋蟬露。衫袖時飄卷雁風。子細尋思底模樣。騰騰又過玉關東。

題衡陽隱士山居

閑居不問世如何。雲起山門日已斜。放鶴去尋三島客。任人來看四時花。松醪臘醞安神酒。布水宵煎覓句茶。畢竟金多也頭白。算來爭得似君家。

戲贈漁家

見君生計羨君閑。求食求衣有底難。養一箔蠶供釣線。種千莖竹作漁竿。葫蘆杓酌春濃酒。舴艋舟流夜漲灘。卻笑儂家最辛苦。聽蟬鞭馬入長安。

題汪氏茅亭

茅亭客到多稱奇。茅亭之上難題詩。出塵景物不可狀。小手篇章徒爾爲。牛畔稻苗新雨後。鶴邊松韻晚風時。君今酷愛人間事。爭得安間老在茲。

卜第東歸將及故園有作

平生操立有天知。何事謀身與志違。上國獻詩還不遇。故園經亂又空歸。山城欲暮人烟斂。江月初寒釣艇歸。且把風寒作閑事。懶能和淚拜庭闈。

贈友人罷舉赴辟命

連天一水浸吳東。十幅帆飛二月風。好景採拋詩句裏。別愁驅入酒杯中。魚依岸柳眠圓影。鳥傍岳花戲暖紅。不是桂枝終不得。自緣年少好從戎。

贈休糧僧

自言因病學休糧。本意非求不死方。徒有至人傳道術。更無齋客到禪房。雨中林鳥歸巢晚。霜後岳猿拾橡忙。爭似吾師無一事。穩披雲衲坐藤牀。

維揚春日再遇孫侍御

本爲榮家不爲身。讀書誰料轉家貧。三年行卻千山路。兩地思歸一主人。絡岸柳絲懸細雨。繡田花朵弄殘春。多情御史應嗟見。未上青雲白髮新。

亂後宿南陵廢寺寄沈明府

祇共寒燈坐到明。塞鴻衝雪一聲聲。亂時爲客無人識。廢寺吟詩有鬼驚。且把酒杯添志氣。已將身事託公卿。男兒仗劍酬恩在。未肯徒然過一生。

途中春

年光身事旋成空。畢竟何門遇至公。人世鶴歸雙鬢主。客程蛇遶亂山中。牧童向日眠春草。漁父隈巖避晚風。一醉未醒花又落。故鄉回首楚關東。

書齋卽事



時清祇合力爲儒。不可家貧與善疎。賣卻屋邊三畝地。添成窗下一牀書。沿溪摘果霜晴後。出竹吟詩月上初。鄉里老農多見笑。不知稽古勝耕鋤。

雋陽道中

客路客路何悠悠。蟬聲向背槐花愁。爭知百歲不百歲。未合白頭今白頭。四五朵山妝雨色。兩三行雁帖雲秋。輸他江上垂綸者。祇在船中老便休。

秋日臥病

浮世浮名能幾何。致身流落向天涯。少年心壯輕爲客。一日病來思在家。山頂老猿啼古木。渡頭新雁下平沙。不堪吟罷西風起。黃葉滿庭寒日斜。

旅泊遇郡中叛亂示同志

握手相看誰敢言。軍家刀劍在腰邊。遍搜寶貨無藏處。亂殺平人不怕天。古寺拆爲修寨木。荒墳開作整城塹。郡侯逐出渾閑事。正是鑾輿幸蜀年。

山中寄詩友

山深長恨少同人。覽景無時不憶君。庭果自從霜後熟。野猿頻向屋邊聞。琴臨秋水彈明月。酒就東山酌白雲。仙桂算攀攀合得。平生心力盡於文。

題瓦棺寺真上人院矮檜

天生仙檜是長材。栽檜希逢此最低。一自舊山來砌畔。幾番凡木與雲齊。迴無斜影教僧踏。免有閑枝引鶴棲。今日偶題題似着。不知題後更誰題。

江下初秋寓泊

濛濛烟雨蔽江村。江館愁人好斷魂。自別家來生白髮。爲侵星起謁朱門。也知柳欲開春眼。爭奈萍無入土根。兄弟無書雁歸北。一聲聲覺苦於猿。

投從叔補闕

吾宗不謁謁詩宗。常仰門風繼國風。空有篇章傳海內。更無親族在朝中。其來雖媿源流淺。所得須憐雅頌同。三十年吟到今日。不妨私薦亦成公。

贈張員外兒

張公一子才三歲。聞客吟聲使出來。喚物舌頭猶未穩。誦詩心孔迴然開。天生便是成家慶。年長終爲問世才。月裏桂枝知有分。不勞諸文作梯媒。

入關寄九華友人

坐牀難穩露蟬新。便作東西馬上人。醲酒卻輸耽睡客。好山翻對不吟人。無多志氣禁離別。強半年光屬苦辛。篋裏篇章頭上雪。未知誰戀杏園春。

冬末自長沙遊桂嶺留獻所知

家隔重湖歸未期。更堪南去別深知。前程笑到山多處。上馬愁逢歲盡時。四海內無容足地。一生中有苦心詩。朱門祇見朱門事。獨把孤寒問阿誰。

送福昌周繇少府歸寧兼謀隱

少見古人無遠慮。如君真得古人情。登科作尉官雖小。避世安親祿已榮。一路水雲生隱思。幾山猿鳥認吟聲。知君未作終焉計。要著文章待太平。

賀顧雲侍御府主與子弟奏官

敕下時  
年七歲

青桂朱袍不賀兄。賀兄榮是見兒榮。孝經始向堂前徹。官語當從幕下迎。戲把藍袍包果子。嬌將竹笏惱先生。自慙亂世無知己。弟姪鞭牛傍隴耕。

舟行卽事

年少髭鬚欲侵別。家三日幾般心。朝隨賈客憂風色。夜逐漁翁宿葦林。秋水鷺飛紅蓼晚。暮山猿叫白雲深。重陽酒熟茱萸紫。卻向江頭倚棹吟。

山居寄同志

茅齋深僻絕輪蹄。門徑緣莎細接溪。垂釣石臺依竹壘。待賓茶竈就巖泥。風生谷口猿相叫。月照松頭鶴並棲。不是無端過時日。擬從窗下躡雲梯。

將入關安陸遇兵寇

家貧無計早離家。離得家來塞滯多。已是數程行雨雪。更堪中路阻兵戈。幾州戶口看成血。一旦天心卻許和。四面烟塵少無處。不知吾土自如何。

寄臨海姚中丞

夏辭旌旆已秋深。永夕思量淚滿襟。風月易斑搜句鬢。星霜難改感恩心。尋花洞裏連春醉。望海樓中徹曉吟。雖有夢魂知處所。去來多被角聲侵。

秋日閑居寄先達

到頭身事欲何爲。窗下工夫鬢上知。乍可百年無稱意。難教一日不吟詩。風驅早雁衝湖色。雨挫殘蟬點柳枝。自古書生也如此。獨堪惆悵是明時。

題覺禪和

少見修竹德似師。茅堂佛像亦隨時。禪衣衲後雲藏線。夏臘高來雪印眉。耕地誠侵連塚土。伐薪教護帶巢枝。有時問着經中事。卻道山僧總不知。

感秋

年年名路謾辛勤。襟袖空多馬上塵。畫戟門前難作客。釣魚船上易安身。冷烟粘柳蟬聲老。寒渚澄星雁叫新。自是儂家無住處。不關天地窄於人。

題德元上人院

刳得心來忙處閑。閑中方寸闊於天。浮生自是無空性。長壽何曾有百年。罷定磬敲松鱗月。解眠茶煮石根泉。我雖未似師披納。此理同師悟了然。

投長沙裴侍郎

此身雖賤道長存。非謁朱門謁孔門。祇望至公將卷讀。不求朝士致書論。垂綸雨結漁鄉思。吹木風傳雁夜魂。男子受恩須有地。平生不受等閑恩。

和友人見題山居

避時多喜葺居成。七字君題萬象清。開戶曉雲連地白。訪人秋月滿山明。庭前樹瘦霜來影。洞口泉噴雨後聲。有景供吟且如此。算來何必躁於名。

獻長沙王侍郎

文星漸見射台星。皆仰爲霖沃衆情。天澤逼來逢聖主。辭林盛去得書生。雲粧嶽色供吟景。月澗湘流遞政聲。美化事多難諷誦。未如耕釣口分明。

投江上崔尙書

此生何路出塵埃。猶把中才謁上才。閉戶十年專筆硯。仰天無處認梯媒。馬前霜葉催歸去。枕上邊鴻喚覺來。若許登門換鬢鬣。必應辛苦事風雷。

書事投所知

古陌寒風來去吹。馬蹄塵旋上麻衣。雖然干祿無休意。爭奈趨時不見機。詩思趁雲從嶽涌。鄉心隨雁遶湖飛。肯將骨肉輕離別。未遇人知未得歸。

秋日湖外書事

十五年來筆硯功。祇今猶在苦貧中。三秋客路湖光外。萬里鄉關楚邑東。鳥逕杖藜山翳雨。猿林欹枕樹搖風。朱門處處若相似。此命到頭通不通。

題宗上人舊院

此院重來事事乖。半欹茅屋草侵塔。啄生鴉憶啼松枿。接果猿思嘯石崖。壁上塵粘蒲葉扇。牀前苔爛笱皮鞋。分明記得談空日。不向秋風更愴懷。

亂後出山逢高員外

自從亂後別京關。一入烟蘿十五年。重出故山生白髮。卻裝新卷謁清賢。窗迴旅夢城頭角。柳結鄉愁雨後蟬。名姓暗投心暗祝。永期收拾向門前。

訪蔡融因題

杖藜時復過荒郊。來到君家不忍拋。每見苦心修好事。未嘗開口怨平交。一溪寒色漁收網。半樹斜陽鳥傍巢。必若天工主人事。肯交吾子委衡茅。

友人贈舍弟依韻戲和

吾家此弟有何知。多媿君開道業基。不覺裹頭成大漢。昨來竹馬作童兒。還緣世遇兵戈鬧。祇恐身修禮樂遲。及見和詩詩自好。礪公不到更何時。

下第東歸道中作

一迴落第一寧親。多是途中過卻春。心火不銷雙鬢雪。眼泉難濯滿衣塵。苦吟風月唯添病。遍識公卿未免貧。馬壯金多有官者。榮歸卻笑讀書人。

館舍秋夕

寒雨蕭蕭燈焰青。燈前孤客難爲情。兵戈鬧日別鄉國。鴻雁過時思弟兄。冷極睡無離枕夢。苦多吟有徹雲聲。出門便作還家計。直至如今計未成。

哭山友

十載同棲廬嶽雲。寒燒枯葉夜論文。在生未識公卿面。至死不離麋鹿羣。從見蓬蒿叢壞屋。長憂雨雪透荒墳。把君詩句高聲讀。想得天高也合聞。

獻池州牧

池陽今日似漁陽。大變凶年作小康。江路靜來通客貨。郡城安後絕戎裝。分開野色收新麥。驚斷鶯聲摘嫩桑。縱有逋民歸未得。遠聞仁政旋還鄉。

送韋書記歸京

座主侍  
耶同舉

韋杜相逢眼自明。事連恩地倍牽情。聞歸帝里愁攀送。知到師門話姓名。朝客半修前輩禮。古人多重晚年榮。從來有淚非無淚。未似今朝淚滿纓。

贈休禪和

爲僧難得不爲僧。僧戒僧儀未是能。弟子自知心了了。吾師應爲醉騰騰。多生覺悟非關衲。一點分明不在燈。祇道詩人無佛性。長將三雅入三乘。

送李先輩從軍塞上

去草軍書出帝鄉。便從城外學戎裝。好隨漢將收胡土。莫遣胡兵近漢疆。灑磧雪粘旗力重。凍河風揭角聲長。此行也是男兒事。莫向征人恃桂香。

和友人送弟

君說無家祇弟兄。此中言別若爲情。干戈鬧日分頭去。山水寒時信路行。月下斷猿空有影。雪中孤雁卻無聲。我今骨肉雖飢凍。幸喜團圓過亂兵。

酬張員外見寄

分應天與吟詩老。如此兵戈不廢詩。生在世間人不識。死於泉下鬼應知。啼花蜀鳥春同苦。叫雪巴猿晝



共飢今日逢君惜分手。一枝何校一年遲。

獻新安于尙書

九土雄師竟若何。未如良牧與天和。月留清俸資家少。歲計陰功及物多。四野綠雲籠稼穡。千山明月靜干戈。行人耳滿新安事。盡是無愁父老歌。

亂後書事寄同志

九五如今盡用兵。短戈長戟困書生。思量在世頭堪白。晝度歸山計未成。皇澤正需新將士。侯門不是舊公卿。到頭詩卷須藏卻。各向漁樵混姓名。

投宜諡張侍郎亂後遇毘陵

此生今日似前生。重著麻衣特地行。經亂後囊新卷軸。出山來見舊公卿。雨籠葢壁吟燈影。風觸蟬枝噪浪聲。聞道中興重人物。不妨西去馬蹄輕。

下第投所知

落第愁生曉鼓初。地寒才薄欲何如。不辭更寫公卿卷。卻是難修骨肉書。御苑早鶯啼暖樹。釣鄉春水浸貧居。擬離門館東歸去。又恐重來事轉疎。

哭方干

何言寸祿不沾身。身沒詩名萬古存。況有數篇關教化。得無餘慶及兒孫。漁樵共壘墳三尺。猿鶴同棲月

一村天下未寧吾道喪，更誰將酒酌吟魂。

秋日泊浦江

一帆程歇九秋時，漠漠蘆花拂浪飛。寒浦更無船並宿，暮山時見鳥雙歸。照雲烽火驚離抱，剪葉風霜逼暑衣。江上漸明汀露濕，靜驅吟魄入元微。

白髮吟

一莖兩莖初似絲，不妨驚度少年時。幾人亂世得及此，今我滿頭何足悲。九轉靈丹那勝酒，五音清樂未如詩。家山蒼翠萬餘尺，藜杖楮冠輸老兒。

下第寄池州鄭員外

省出蓬蒿修謁初，蒙知曾不見生疎。侯門數處將書荐，帝里經年借宅居。未必有詩堪諷誦，祇憐無援過吹嘘。如今足得成持取，莫使江湖卻釣魚。

贈題兜率寺閑上人院

人間寺應諸天號，真行僧禪此寺中。百歲有涯頭上雪，萬般無染耳邊風。挂帆波浪驚心白，上馬塵埃翳眼紅。畢竟浮生謾勞役，算來何事不成空。

別四明鍾尚書

九華天際碧嵯峨，無奈春來入夢何。難與英雄論教化，卻思猿鳥共烟蘿。風前柳態閑時少，雨後花容淡

處多。都道人生有離別。且將詩句代離歌。

題護國大師塔

莫認雙林是佛林。禪棲無地亦無金。塔前盡禮灰來相。衲下誰宗印了心。笠象允明雙不見。線源分派寸難尋。吾師覺路余知處。大藏經門一夜吟。

春日山中對雪有作

竹樹無聲或有聲。霏霏漠漠散還凝。嶺梅謝後重粧點。巖水鋪來卻結冰。牢繫鹿兒防獵客。滿添茶鼎候吟僧。好將膏雨同功力。松徑莓苔又一層。

山中對雪有作

一渾乾坤萬象收。唯應不壅大江流。虎狼遇獵難藏跡。松柏因風易舉頭。玉帳英雄攜妓賞。山村烏雀共民愁。豈堪久蔽蒼蒼色。須放三光照九州。

早發

東窗未明塵夢蘇。呼童結束登征途。落葉鋪霜馬蹄滑。寒猿嘯月人心孤。時逆帽簷風刮頂。旋呵鞭手冷粘鬚。青雲快活一未見。爭得安閑釣五湖。

題仇處士郊居

處士棄官卜居。

江南景簇此林亭。手板藍裙自可輕。洞裏客來無俗話。郭中人到有公情。閑敲巖果呼猿接。時釣溪魚引鶴爭。笑我有詩三百首。馬蹄紅日急於名。

依韻次同年張曙先輩見寄之什

天上詩名天下傳。引來齊列玉皇前。大仙錄後頭無雪。至樂成來竈絕烟。笑躡紫雲金作闕。夢拋塵世鐵爲船。九華山叟驚凡骨。同到蓬萊豈偶然。

亂後逢李昭象敘別

李生李生何所之。家山峯雲胡不歸。兵戈到處弄性命。禮樂向人生是非。卻與野猿同橡塢。還將溪鳥共漁磯。也知不是男兒事。爭奈時情賤布衣。

晚春寄同年張曙先輩

莫將時態破天真。祇合高歌醉過春。易落好花三箇月。難離浮世百年身。無金潤屋渾閑事。有酒扶頭是了人。恩地未酬閑未得。一迴醒話一沾巾。

# 全五代詩卷四

梁

杜荀鶴四

長安春感

出京無計住京難。深入東風轉索然。滿眼有花寒食下。一家無信楚江邊。此時晴景愁於雨。是處鶯聲苦。卻憚公道算來終達去。更從今日望明年。

登靈山水閣貽釣者

江上見僧誰是了。修齋補衲日勞身。未勝漁父閑垂釣。獨背斜陽不采人。縱有風波猶得睡。總無蓑笠始爲貧。瓦瓶盛酒瓷甌酌。荻浦蘆灣是要津。

贈溧水崔少府

庭戶蕭條燕雀喧。日高窗下枕書眠。祇聞留客教沽酒。未省逢人說料錢。洞口禮星披鶴氅。溪頭吟月上漁船。九華山叟心相許。不計官卑贈一篇。

讀張僕射詩

秋吟一軸見心胸。萬象搜羅詠欲空。才大卻嫌天上柱。世危翻立陣前功。廉頗解武文無說。謝朓能文武

不通雙美總輸張太守。二南章句六鈞弓。

題所居村舍

家隨兵盡屋空存。稅額寧容減一分。衣食旋營猶可過。賦輸長急不堪聞。蠶無夏織桑充塞。田廢春耕犢  
勞軍。如此數州誰會得。殺民將盡更邀勳。

獻錢塘縣羅著作判官

還鄉夫子遇賢侯。撫字情知不自由。莫把一名專懊惱。放教雙眼絕冤讐。猩袍懶著辭公宴。鶴氅閑披訪  
道流。猶有九華知己在。羨君高臥早回頭。

遣懷

驅馳歧路共營營。祇爲人間利與名。紅杏園中終擬醉。白雲山下懶歸耕。題橋每念相如志。佩印當期季  
子榮。謾道疆親堪倚賴。到頭須是有前程。

題開元寺門閣

一登高閣眺清秋。滿目風光盡勝遊。何處畫橈尋綠水。幾家鳴笛咽紅樓。雲山已老應長在。歲月如波祇  
暗流。唯有禪居離塵俗。了無榮辱挂心頭。

出關投孫侍御

東歸還著舊麻衣。爭免花前有淚垂。每歲春光九十日。一生年少幾多時。青雲寸祿心耕早。明月仙枝分

種遲不爲感恩酬未得。五湖閑作釣魚師。

送項山人歸天台

因話天台歸思生。布囊藤杖笑離城。不教日月拘身事。自與煙霞結野情。雲鎖古潭龍色黑。露淋秋檜鶴聲清。此中是處堪終隱。何要世人知姓名。

題江寺禪和

江寺禪僧似悟禪。壞衣芒屨住茅軒。懶求施主修真像。翻說經文是妄言。出浦釣船驚宿雁。伐巖樵斧迸寒猿。行人莫問師宗旨。眼不浮華耳不喧。

題弟姪書堂

何事居窮道不窮。亂時還與靜時同。家山雖在干戈地。弟姪常修禮樂風。窗竹影搖書案上。野泉聲入硯池中。少年辛苦終身事。莫向光陰惰寸功。

和友人寄長林孟明府

爲政爲人漸見心。長才聊屈宰長林。莫嫌月入無多俸。須喜秋來不廢吟。寒雨旋疎叢菊豔。晚風時動小松陰。訟庭閒寂公書少。留客看山索酒斟。

登城有作

上得孤城向晚春。眼前何事不傷神。遍看原上纍纍塚。曾是城中汲汲人。盡謂黃金堪潤屋。誰思荒骨旅

成塵一名一宦平生事。不放愁侵易過身。

秋日山中寄池州李常侍

近來參謁陡生疎。因向雲山僻處居。出爲羈孤營糲食。歸同弟姪讀生書。風凋古木秋陰薄。月滿寒山夜景虛。但得中興知己在。算應身未老樵漁。

辭楊侍郎

春在門闌秋未離。不因人薦只因詩。半年賓館成前事。一日侯門失舊知。霜島樹凋猿叫夜。湖田穀熟雁來時。西風萬里東歸去。更把愁心說向誰。

喜從弟雪中遠至有作

深山大雪懶開門。門逕行蹤自爾新。無酒禦寒雖寡況。有書供讀且資身。便均情愛同諸弟。莫更生疎似外人。晝短夜長須強學。學成貧亦勝他貧。

送僧歸國清寺

吟送越僧歸海涯。僧行渾不覺程賒。路沿山腳潮痕出。睡倚松根日色斜。撼錫度岡猿抱樹。挈瓶盛浪鷺翹沙。到參禪後知無事。看引秋泉灌藕花。

題汪明府山居

不似當官祇似閑。野情終日不離山。方知薄宦難拘束。多與高人作往還。牛笛漫吹煙雨裏。稻苗平入水



雲間羨君公退歸。欹枕免向他門厚客顏。

宿東林寺題願公院

古寺沈沈僧未眠。搢頤將客說閑緣。一溪月色非塵世。滿洞松聲似雨天。簷底水涵抄律燭。窗間風引煮茶煙。無由住得吟相伴。心繫青雲十五年。

山居自遣

茅屋周回松竹陰。山翁時挈酒相尋。無人開口不言利。只我白頭空愛吟。月在釣潭秋睡重。雲橫樵逕野情深。此中一日過一日。有底閑愁得到心。

亂後旅中遇友人

念子爲儒道未亨。依依心向十年兄。莫依亂世輕依託。須學前賢隱姓名。大國未知何日靜。舊山猶可入雲耕。不如自此同歸去。帆挂秋風一信程。

投鄭先輩

匣中長劍未酬恩。不遇男兒不合論。悶向酒杯吞日月。閑將詩句問乾坤。寧辭馬足勞關路。肯爲漁竿憶水村。兩鬢欲斑三百首。更教裝寫傍誰門。

途中有作

無論南北與西東。名利牽人處處同。枕上事仍多馬上。山中心更甚關中。川原晚結陰沈氣。草樹秋生索

漠風百歲此身如且健。大家閑作臥雲翁。

和舍弟題書堂

兄弟將知大自強。亂時同葺讀書堂。岳泉遇雨多還鬧。溪竹唯風少卽涼。藉草醉吟花片落。傍山閑步藥苗香。團圓便是家肥事。何必盈倉與滿箱。

送蜀客遊維揚

見說西川景物鱗。維揚景物勝西川。青春花柳樹臨水。白日綺羅人上船。夾岸畫樓難惜醉。數橋明月不教眠。送君嬾問君回日。才子風流正少年。

旅寓

暗算鄉程隔數州。欲歸無計淚空流。已違骨肉來時約。更束琴書何處遊。畫角引風吹斷夢。垂楊和雨結成愁。去年今日還如此。似與青春有舊讎。

維揚冬末寄幕中二從事

江上數株桑棗樹。自從離亂更荒涼。那堪旅館經殘臘。祇把空書寄故鄉。典盡客衣三尺雪。鍊精詩句一頭霜。故人多在芙蓉幙。應笑孜孜道未光。

辭鄭員外入關

男兒三十尙蹉跎。未遂青雲一桂科。在客易爲銷歲月。到家難住似經過。帆飛楚國風濤闊。馬度藍關雨

雪多長把行藏信天道。不知天道竟如何。

入關因別舍弟

吾今別汝汝聽言。去住人情足可安。百口度荒均食易。數年經亂保家難。莫愁寒族無人薦。但願春官把卷看。天道不欺心意是。帝鄉吾土一般般。

贈彭蠡釣者

偏坐漁舟出葦林。葦花零落向秋深。祇將波上鷗爲侶。不把人間事繫心。傍岸歌來風欲起。卷絲眠去月初沈。若教我似君閑放。贏得湖山到老吟。

送友人入關

此去青雲莫更疑。出人才行足人知。況當朝野搜賢日。正是孤寒取士時。仙島煙霞通鶴信。早春雷雨與龍期。我今不得同君去。兩鬢霜欺桂一枝。

送友人宰潯陽

高興那言去路長。非君不解愛潯陽。有時猿鳥來公署。到處煙霞是道鄉。釣艇滿江魚賤菜。紙密連嶽楮多桑。陶潛舊隱依稀在。好繼高蹤結草堂。

敍吟

多慙到處有詩名。轉覺吟詩僻性成。度水卻嫌船著岸。過山翻恨馬貪程。如響雪月年年景。似夢笙歌處處

處聲未合白頭今已白。自知非爲別愁生。

行次滎陽卻寄諸弟

難把歸書說遠情。奉親多闕拙爲兄。早知寸祿滎家晚。悔不深山共汝耕。枕上算程關月落。帽前搜景嶽雲生。如今已作長安計。祇得辛勤取一名。

登石壁禪師水閣有作

石壁早聞僧說好。今來偏與我相宜。有山有水堪吟處。無雨無風見景時。漁父晚船分浦釣。牧童寒笛倚牛吹。畫人畫得從他畫。六幅應輸八句詩。

贈袒肩和尚

山衣草屐染莓苔。雙眼猶慵向俗開。若比吾師居世上。何如野客臥岳隈。才聞錫杖離三楚。又說隨緣向五臺。乘醉吟詩問禪理。爲誰須去爲誰來。

閒居卽事

形覺清羸道覺肥。竹門前徑靜相宜。一壺村酒無求處。數朵庭花見落時。章句偶爲前輩許。話言多被俗人疑。一枝仙桂如攀得。祇此山前是老期。

自敘

酒甕琴書伴病身。熟諳時事樂於貧。寧爲宇宙閑吟客。怕作乾坤竊祿人。詩旨未能忘救物。世情奈值不

容真平生肺腑無言處。白髮吾唐一逸人。

空閑二公遞以禪律相鄙因而解之

一教誰云闢二途。律禪禪律智歸愚。念珠在手墮禪衲。禪衲披肩壞念珠。象外空空外象無。中有作有中無。有無無有師窮取。山到平來海亦枯。

寄温州崔博士

懷君勞我寫詩情。宰宰陰風有鬼聽。縣宰不仁工部餓。酒家無識翰林醒。眼昏經史天何在。心盡英雄國未寧。好向賢侯話吟侶。莫教辜負少微星。

李昭象云與二三同人見訪有寄

得君書後病顏開。云拉同人訪我來。在路不妨衝雨雪。到山還免踏塵埃。吟沈水閣何宵月。坐破松巖幾處苔。貧舍款賓無別物。止於空戰大尊罍。

自江西歸九華

他鄉終日憶吾鄉。及到吾鄉值亂荒。雲外好山看不見。馬頭歧路去何忙。無衣織女桑猶小。闕食農夫麥未黃。許大乾坤吟未了。揮鞭回首出陵陽。

和友人見題山居水閣八韻

池閣初成眼豁開。眼前霽景屬微才。試攀簷果援先見。纔把漁竿鶴即來。修竹已多猶可種。豔花雖少不

勞栽南昌一榻延徐孺。楚國千鍾逼老萊。未稱執鞭奔紫陌。惟宜策杖步蒼苔。籠禽豈是摩霄翼。潤木元非澗下材。鑿已每將天作鏡。陶情常以海爲杯。和君詩句吟聲大。蟲豸聞之謂蟄雷。

感寓

大海波濤淺。小人方寸深。海枯終見底。人死不知心。

春閨怨

朝喜花豔春。暮悲花委塵。不悲花落早。悲妾似花身。

馬上行

五里復五里。去時無住時。日將家漸遠。猶恨馬行遲。

釣叟

茅屋深灣裏。釣船橫竹門。經營衣食外。猶得弄兒孫。

再經胡城縣

去歲曾經此縣城。縣民無口不冤聲。今來縣宰加朱紱。便是生靈血染成。

讀諸家詩

辭賦文章能者稀。難中難者莫過詩。直應吟骨無生死。祇我前身是阿誰。

春來燕

我屋汝嫌低不住。雕梁畫閣也知寬。大須穩擇安巢處。莫道巢成卻不安。  
清溪來明府出二子請詩因遺一絕

珠明玉潤盡驚人。不稱寒門不稱貧。若向吾唐作雙瑞。使同祥鳳與祥麟。

哭陳陶

未陽山下傷工部。採石江邊弔翰林。兩地荒墳各三尺。卻成開解哭君心。

哭貝韜

交朋來哭我來歌。喜傍山家葬薜蘿。四海十年人殺盡。似君埋少不埋多。

蠶婦

粉色全無飢色加。豈知人世有榮華。年年道我蠶辛苦。底事渾身著苧麻。

山寺老僧

草屨無塵心地閑。靜隨猿鳥過寒暄。眼昏齒落看經遍。卻向僧中總不言。

閩中秋思

雨勻紫菊叢叢色。風弄紅蕉葉葉聲。北畔是山南畔海。祇堪圖畫不堪行。

八駿圖

丹腹傳真未得真。那知筋骨與精神。祇今恃駿憑毛色。綠耳驂騮賺殺人。

贈僧

利門名路兩何憑。百歲風前短焰燈。祇恐爲僧僧不了。爲僧得了總輸僧。

秋夕

世間多少能詩客。誰是無愁得睡人。自我夜來霜月下。到頭吟魄始終身。

溪興

山雨溪風卷釣絲。瓦甌蓬底獨斟時。醉來睡着無人喚。流下前溪也不知。

過巢湖

世人貪利復貪榮。來向湖邊始至誠。男子登舟與登陸。把心何不一般行。

傷硤石縣病叟

無子無孫一病翁。將何筋力事耕農。官家不管蓬蒿地。須勒王租出此中。

贈老僧

童子爲僧今白首。暗鋤心地種閑情。時將舊衲添新線。披坐披行過一生。

釣叟

田不曾耕地不鋤。誰人閑散得如渠。渠將底物爲香餌。一度擡竿一箇魚。

溪岸秋思



桑柘窮頭三四家。挂罾垂釣是生涯。秋風忽起溪灘白。零落岸邊蘆荻花。  
春日旅寓

滿城羅綺拖春色。幾處笙歌揭畫樓。江上有家歸未得。眼前花是眼前愁。

田翁

白髮星星筋力衰。種田猶自伴孫兒。官苗若不平平納。任是豐年也受飢。  
秋江雨夜逢詩友

故友別來三四載。新詩吟得百餘篇。夜來江上秋無月。恨不相逢在雪天。

感春

無況青雲有恨身。眼前花似夢中春。浮生七十今三十。已是人間半世人。

題花木障

不假東風次第吹。筆勻春色一枝枝。由來畫看勝栽看。免見朝開暮落時。

顧雲侍御出二子請詩因遺一絕

二雛毛骨秀仍奇。小小能吟大大詩。想得月中仙桂樹。各從生日長新枝。

秋夕病中

壞屋不眠風雨夜。故園無信水雲秋。病中枕上誰相問。一一蟬聲槐樹頭。

宿樂城驛卻寄常山張書記

一更更盡到三更。吟破離心句未成。數樹秋風滿庭月。憶君時復下塔行。

湘江秋夕

三湘月色三湘水。浸骨寒光似練鋪。一夜塞鴻來不住。故鄉書信半年無。

旅懷

兼葭月冷時聞雁。楊柳風和日聽鶯。水涉山行二年客。就中偏怕雨船聲。

贈崔道士

四海兵戈無靜處。人家廢業望烽煙。九華道士渾如夢。猶向尊前笑揭天。

題道林寺

身未立間終日苦。身當立後幾年榮。萬般不及僧無事。共水將山過一生。

贈質上人

枰坐雲遊出世塵。兼無餅鉢可隨身。逢人不說人間事。便是人間無事人。

夏日題悟空上人院

三伏閉門披一衲。兼無松竹蔭房廊。安禪不必須山水。滅得心中火自涼。

經嚴陵釣臺

蒼翠雲峰開俗眼。泓澄煙水浸塵心。唯將道業爲芳餌。釣得高名直至今。  
關試後筵上別同人

日午離筵到夕陽。明朝秦地與吳鄉。同年多是長安客。不信行人欲斷腸。

鷓鴣

一般毛羽結羣飛。兩岸煙汀好景時。流水有魚銜得出。看來卻是鷺鷥飢。  
宿村舍

野人於我有何情。半掩柴門向月明。深夜欲眠未著。一叢寒木一猿聲。  
題新雁

離家

暮天新雁起汀洲。紅蓼花疎水國秋。想得故園今夜月。幾人相憶在江樓。  
丈夫三十身如此。疲馬離鄉懶著鞭。槐柳路長愁殺我。一枝蟬到一枝蟬。  
旅舍遇雨

送人歸淝上

月華星彩坐來收。綠色江聲暗結愁。半夜燈前十年事。一時和雨到心頭。  
巢湖春漲喻溪深。纔過東關見故林。莫道南來總無利。水亭山寺二年吟。

自遣

糲食羸衣隨分過。堆金積帛欲如何。百年身後一邱土。貧富高低爭幾多。

聞子規

楚天空闊月成輪。蜀魄聲聲似告人。啼得血流無用處。不如緘口過殘春。

秋夜苦吟

吟盡三更未著題。竹風松雨共淒淒。此時若有人來聽。始覺巴猿不解啼。

秋夜聞砧

荒涼客舍眠秋色。砧杵家家弄月明。不及巴山聽猿夜。三聲中有不愁聲。

將過湖南經馬當山廟因書三絕

人說馬當波浪險。我經波浪似通衢。大凡君子行藏是。自有龍神衛過湖。  
貪殘官吏虔誠謁。毒害商人瀝膽過。祇怕馬當山下水。不知平地有風波。  
九江連海一般深。未必船經廟下沈。頭上蒼蒼沒瞞處。不如平取一生心。

小松

自小刺頭深草裏。而今漸覺出蓬蒿。時人不識凌雲木。直待凌雲始道高。

醉書僧壁

九華山色真堪愛。留得高僧爾許年。聽我吟詩供我酒。不曾穿得判齋錢。

寄李隱居

自小棲元到老閑。如雲如鶴住應難。溪山不必將錢買。贏得來來去去看。



# 全五代詩卷五

梁

李山甫

山甫咸通中累舉不第。梁初依魏博羅宏信及其子紹威幕府爲從事。嘗逮事樂彥禎。文筆雄健。著有詩集。牧豎閑談。山甫美姿容。髮長五尺餘。嘗沐後理髮。客造焉。疑爲婦人。趨出。山甫連呼之方悟。唐音戊籤。唐書樂彥禎傳。彥禎喜儒術。引山甫及公乘億在幕。僞熾之亂。使山甫說鎮州王鎔合同盟拒賊。鎔不克。

從。王鐸傳。鐸鎮滄洲。過魏。彥禎子從。訓心利。鐸妓妾。山甫以數舉被黜。怨中朝大臣。專從訓。伏兵漳南高雞泊劫之。鐸家屬吏佐三百餘人皆遇害。按咸通中。鐸嘗再典禮闈。山甫正爲鐸所黜也。全唐詩話。山甫數被黜。依魏博羅紹威幕。府嘗有詩云。勸君莫用誇頭角。夢裏輪贏總未真。譏執政也。巢寇之亂。翰林待詔王敬邀者。遊鄴。遇于道。觀山甫謂曰。幽蘭綠衣可得聞乎。邀應命奏之。曲終。潛然曰。憶在咸通玉亭秋。夜供奉至尊。不意流離至此也。山甫賦詩曰。幽蘭綠水耿清音。歎息先生枉用心。世上幾時曾好古。人前何必獨霑襟。致身不似笙簧巧。悅耳寧如鄭衛淫。三尺絲桐七尺線。子期師曠兩沈沈。句成亦自黯然悲。其不遇也。胡孝轅癸籤一菊詩也。陳俶達云。但令逢採摘。寧辭獨晚榮。婉厚乃爾。朱灣云。受氣何曾異。開花獨自渥。費較量矣。山甫云。越處不容依玉砌。要時還許上金樽。曾似毒口罵將來。豈非時代爲之乎。又云。世豈有國號國姓。可入詩者哉。然如盧照隣人歌小歲酒。花舞大唐春。山甫但經春色還秋色。不覺楊家是李家。非佳句乎。觀此事無不可使。只巧匠少耳。四清詩話。高英秀者。吳越國人。與鬻寧爲詩友。口給好罵滑稽。嘗譏名人詩病云。李山甫覽漢史云。王莽弄來曾半破。曹公將去便平沈。定是破船詩。李羣玉咏鷓鴣云。方穿詩曲崎嶇路。又聽鉤騶格。

磔聲定是林語詩。羅隱云。雲中雞犬劉安過。月裏笙歌煬帝歸。定是見鬼詩。杜荀鶴曰。今日偶題題似著。不知題後更誰題。以衛子詩也。不然。安有四蹄。贊寧笑謝而已。

遣懷

長松埋澗底。鬱鬱未出原。孤雲飛隴首。高潔不可攀。古道貴拙直。時事不足言。莫飲盜泉水。無爲天下先。智者與愚者。盡歸北邙山。唯有東流水。年光不暫閑。

山中依韻答劉書記見贈

幽居少人事。三徑草不開。隱几虛室靜。閑雲入座來。至道非內外。詎言才不才。寶月當秋空。高潔無纖埃。心滅百慮滅。詩成萬象回。亦有吾廬在。寂寞舊山隈。從容未歸去。滿地生青苔。謝公寄我詩。清奇不可陪。白雪飛不盡。碧雲欲成堆。驚風出地戶。颯颯似震雷。吟哦山嶽動。令人心膽摧。思君覽章句。還復如望梅。慷慨追古意。曠望登高臺。何當陶淵明。遠師勸影杯。流年將老來。華髮自相催。野寺連屏幃。左右相徘徊。

山中答劉書記寓懷

貴門多冠冕。日與榮辱並。山中有獨夫。笑傲出衰盛。正直任天真。鬼神亦相敬。之子賁邱園。戶牖松蘿映。骨將槁木齊。心同止水淨。筆頭拍金波。座上橫玉柄。芙蓉出秋渚。繡段流清詠。高古不稱時。沈默豈相競。窮搜萬籟息。危坐千峯靜。林僧繼嘉唱。風前亦爲幸。

別墅



此地可求息。開門足野情。窗明雨初歇。日落風更清。蒼蘚槎根匝。碧煙水面生。翫奇心自樂。暑月聽蟬聲。

白歌拙

自憐心計拙。欲語更悲辛。世亂僮欺主。年衰鬼弄人。鏡中顏欲老。江上業長貧。不是劉公樂。何由變此身。

夜吟

除卻閑吟外。人間事事慵。更深成一句。月冷上孤峯。窮理多瞑目。含毫靜倚松。終篇渾不寐。危坐到晨鐘。

山下殘夏偶作

等閑三伏後。獨臥此高邱。殘暑炎於火。林風爽帶秋。聲名何要出。吟詠亦堪休。自許紅塵外。雲谿好漱流。

早秋山中作

誰到山中語。雨餘風氣秋。烟嵐出澗底。瀑布落牀頭。至道亦非遠。僻詩須苦求。千峯有嘉景。拄杖獨巡遊。

春日商山道中作

一逕春光裏。揚鞭入翠微。風來花落帽。雲過雨沾衣。谷鳥銜枝去。巴人負笈歸。殘陽更惆悵。前路客亭稀。

亂後途中

亂離尋故園。朝市不如村。慟哭翻無泪。顛狂覺少魂。諸侯貪割據。羣盜恣并吞。爲問登壇者。何年答漢恩。

陪鄭先輩華山羅谷訪張隱者

白雲閑洞口。飛蓋入嵐光。好鳥共人語。異花迎客香。谷風聞鼓吹。苔石見文章。不是陪仙侶。無因訪阮郎。

題慈雲寺僧院

帝城深處寺。樓殿壓秋江。紅葉去寒樹。碧峯來曉窗。煙霞生淨土。苔蘚上高幢。欲問吾師語。心猿不肯降。

病中答劉書記見贈

病來雙樹下。雲腳上禪袍。頻有瓊瑤贈。空瞻雪月高。已知捐俗態。時許話風騷。衰疾未能起。相思徒自勞。

寄太常王少卿

別後西風起。新蟬坐臥聞。秋天靜如水。遠岫碧侵雲。雅飲純和氣。清吟冰雪文。相思重回首。梧葉下紛紛。

別楊秀才

因亂與君別。相逢悲且驚。開襟魂自慰。拭淚眼空明。故國已無業。舊交多不生。如何又分袂。難話別離情。

惜花

未會春風意。開君又落君。一年今爛漫。幾日便繽紛。別豔那堪賞。餘香不忍聞。尊前恨無語。應解作朝雲。

燕

每歲同辛苦。看人似有情。亂飛春得意。幽語夜聞聲。整羽莊姜恨。迴身漢后輕。豪家足金彈。不用污雕楹。

送劉將軍入關討賊

世人多恃武。何者是真雄。欲滅黃巾賊。須憑黑稍公。指星憂國計。望氣識天風。明日凌雲上。期君第一功。

古石硯

題李員外廳

追琢他山石。方圓一勾深。抱真唯守墨。求用每虛心。波浪因文起。塵埃爲廢侵。憑君更研究。何啻直千金。  
石砌蛩吟響。草堂人語稀。道孤思絕唱。年長漸知非。名利終成患。煙霞亦可依。高邱松蓋古。閑地藥苗肥。  
猿鳥啼嘉景。牛羊傍晚暉。幽棲還自得。清嘯坐忘機。愛彼人深處。白雲相伴歸。

酬劉書記一二知己見寄

見說金臺客。相逢祇論詩。坐來殘暑退。吟許野僧知。自喜幽棲僻。惟慙道義虧。身閑偏好古。句冷不求奇。  
晦迹全無累。安貧自得宜。同人終念我。蓮社有歸期。

寓懷

萬古交馳一片塵。思量名利孰如身。長疑好事皆虛事。卻恐閑人是貴人。老逐少年終不放。辱隨榮後直  
須勻。勸君不用誇頭角。夢裏輸贏總未真。

山中病後作

臥病厭厭三伏盡。商飈初自水邊來。高峯枯槁骨偏峭。野樹扶疎葉未摧。時序追牽從鬢改。蟬聲酸急是  
誰催。雲門不閉全無事。心外沈然一聚灰。

早秋山中作

榮枯無路入千峯。肥遯誰諧此志同。司寇亦曾遭魯黜。步兵何事哭途窮。檜松瘦健滴秋露。戶牖虛明生

晚風山思更清人影絕。隴雲飛入草堂中。

早春微雨

怪來鶯蝶似疑愁。不覺看花漸溼頭。疏影未藏千里樹。遠陰微翳萬家樓。青羅舞袖紛紛轉。紅臉啼珠旋旋收。歲早且須教濟物。爲霖何事愛風流。

寒食二首

柳帶東風一向斜。春陰澹澹蔽人家。有時三點兩點雨。到處十枝五枝花。萬井樓臺疑繡畫。九原珠翠似煙霞。年年今日誰相問。獨臥長安泣歲華。

風煙放蕩花披猖。鞦韆女兒飛出牆。繡袍馳馬拾遺翠。錦袖鬪雞喧廣場。天地氣和融霽色。池臺日暖燒春光。自憐塵土無他事。空脫荷衣泥醉鄉。

南山

鈍碧頑青幾萬秋。直無天地始應休。莫嫌塵土伴遮面。能向樓臺強出頭。霽色陡添千尺翠。夕陽閑放一堆愁。假饒不是神仙骨。終抱琴書向此遊。

曲江二首

南山低對紫雲樓。翠影紅陰瑞氣浮。一種是春長富貴。大都爲水也風流。爭攀柳帶千千手。間插花枝萬萬頭。獨向江邊最惆悵。滿衣塵土避王侯。

江色沈天萬草齊。暖煙晴靄自相迷。蜂憐杏葉細香落。鶯墜柳條濃翠低。千隊國娥輕似雪。一羣公子醉如泥。斜陽怪得長安動。陌上分飛萬馬蹄。

蒲關西道中作

國東王氣凝蒲關。樓臺帖出晴空間。紫煙橫捧大舜廟。黃河直打中條山。地鎖咽喉千古壯。風傳歌吹萬家閑。來來去去身依舊。未及潘年鬢已斑。

兵後尋邊三首

千里煙砂盡日昏。戰餘燒罷閉重門。新成劍戟皆農器。舊着衣裳盡血痕。卷地朔風吹白骨。挂天青氣泣幽魂。自憐長策無人問。羞戴儒冠傍塞垣。

旗頭指處見黃埃。萬馬橫馳鶴翅迴。劍戟遠腥疑血在。山河先暗陣雲來。角聲惡殺悲于哭。鼓勢爭強怒若雷。日暮卻登寒壘望。飽鴟清嘯伏屍堆。

風怒邊砂迸鐵衣。胡兒胡馬正驕肥。將軍對陣誰教入。戰士辭營不道歸。新血濺紅粘蔓草。舊骸堆白映寒暉。胸中縱有銷兵術。欲向何門說是非。

司天臺

拂雲朱檻捧昭回。靜對銅渾水鏡開。太史只知頻奏瑞。蒼生無計可陳災。景公進德星曾退。漢帝推誠日爲迴。何事曠官全不語。好天良月鎖高臺。

讀漢史

四百年間反覆尋。漢家興替好沾襟。每逢姦詐須接手。真遇英雄始醒心。王莽弄來曾半破。曹公將去便平沈。當時虛受君恩者。謾向青編作鬼林。

蜀中寓懷

千里煙霞錦水頭。五丁開得也風流。春裝寶景重重樹。日照仙州萬萬樓。蛙似公孫雖不守。龍如諸葛亦須休。此中無限英雄鬼。應對江山各自羞。

代孔明哭先主

憶昔南陽顧草廬。便乘雷電捧乘輿。酌量諸夏須平取。期刻羣雄待遍鋤。南面未能成帝業。西陵那忍送宮車。九疑山下頻惆悵。曾許微臣水共魚。

又代孔明哭先主

鯨鬣翻騰四海波。始將天意用干戈。盡驅神鬼隨鞭策。全罩英雄入網羅。提劍尙殘吳郡國。垂衣猶欠魏山河。鼎湖無路追仙駕。空使羣臣泣血多。

上元懷古二首

南朝天子愛風流。盡守江山不到頭。總是戰爭收拾得。卻因歌舞破除休。堯行道德終無敵。秦把金湯可自由。試問繇華何處有。雨苔煙草古城秋。

爭帝圖王德盡衰。驟興馳竊亦何爲。君臣都是一場笑。家國同成千載悲。排岸遠橋森似槩。落波殘照燐如旗。今朝城上難迴首。不見樓船索戰時。

隋隄柳

曾傍龍舟拂翠華。至今凝恨倚天涯。但經春色還秋色。不覺楊家是李家。背日古陰從北朽。逐波疏影向南斜。年年只有晴風便。遙爲雷塘送雪花。

陰地關崇徽公主手跡

廣川書跋云。初僕固懷恩之叛。其女沒入官。大歷四年。回紇請婚。因封爲崇徽公主。降可汗道汾州。以手掌托石壁。遂有手痕。今靈石有崇徽公主手痕碑。

一拓纖痕更不收。翠微蒼蘚幾經秋。誰陳帝子和番策。我是男兒爲國羞。寒雨洗來香已盡。澹煙籠着恨長留。可憐汾水知人意。旁與吞聲未忍休。

下第獻所知三首

偶向江頭別釣磯。等閑經歲與心違。虛教六尺受辛苦。枉把一身憂是非。青桂本來無欠負。碧霄何處有因依。春風不用相催促。迴避花時也解歸。

不識人間巧路歧。只將端拙泥神祇。與他名利本無分。卻共水雲曾有期。大底物情應莫料。近來天意也須疑。自憐心計今如此。憑仗春醪爲解頤。

十年磨鏃事鋒鋌。始逐朱旗入戰場。四海風雲難際會。一身肝膽易開張。退飛鶯谷春零落。倒卓龍門路

渺茫今日慙知也。慙命笑餘歌罷忽淒涼。

賀邢州盧員外

紫泥飛詔下金鑾。列象分明世仰觀。北省諫書藏舊草。南宮郎署握新蘭。春歸鳳治恩波暖。曉入鴛行瑞氣寒。偏是此生棲息者。滿衣零淚一時乾。

賀友人及第

得水蛟龍失水魚。此心相對兩何如。敢辭今日須行卷。猶喜他年待薦書。松桂也應情未改。萍蓬爭奈迹還疎。春風不見尋花伴。遙向青雲泥子虛。

謁翰林劉學士不遇

夢繞清華宴地深。洞宮橫鎖曉沈沈。鵬飛碧海終難見。鶴入青霄豈易尋。六尺羈魂迷定止。兩行愁血謝知音。平生只恥凌風翼。隨得鳴珂上禁林。

赴舉別所知

腰劍囊書出戶遲。壯心奇命兩相疑。麻衣盡舉一雙手。桂樹只生三十枝。黃祖不憐鸚鵡客。誌公偏賞鱗麟兒。叔可知我應相痛。回首天涯寄所思。

下第臥病盧員外召遊曲江

眼前何事不傷神。忍向江頭更弄春。桂樹既能欺賤子。杏花爭肯採閒人。麻衣未掉渾身雪。皂蓋難遮滿



面塵珍重列星相借問。嵇康慵病也天真。

方干隱居

咬咬嘎嘎水禽聲。露洗松陰滿院清。溪畔印沙多鶴跡。檻前題竹有僧名。問人遠岫千重意。對客閒雲一片情。早晚塵埃得休去。且將書劍事先生。

山中覽劉書記新詩

記室新詩相寄我。靄然清絕更無過。谿風滿袖吹騷雅。巖瀑無時滴薜蘿。雲外山高寒色重。雪中松苦夜聲多。靜酬嘉唱對幽景。蒼鶴羸棲古木柯。

答劉書記見贈

吟近秋光思不窮。酷探騷雅愧無功。茫然心苦千篇拙。瞑坐神疑萬象空。月上開襟當北戶。竹邊回首揖西風。知音頻有新詩贈。白雪紛紛落郢中。

贈徐十三

春滿南宮白日長。夜來新直錦衣郎。朱排六戟助神聳。玉襯一廳侵骨涼。砌竹拂袍爭草色。庭花飄豔妬蘭香。從今不羨乘槎客。曾到三星列宿傍。

寄衛別駕

曉屐歸來嶽寺深。嘗思道侶會東林。昏沈天竺看經眼。蕭索淨名老病心。雲蓋數重橫隴首。苔花千點遍

松陰知君超達悟空旨。三徑閒行抱素琴。

山中寄梁判官

歸臥東林計偶諧。柴門深向翠微開。更無塵事心頭起。還有詩情象外來。康樂公應頻結社。寒山子亦思多才。星朗雅是道中侶。六藝拘牽在隗臺。

禪林寺作寄劉書記

坐近松風骨自寒。茅齋直拶白雲邊。元關不閉何人到。此事誰論在佛先。天竺老師留一句。曹谿行者答全篇。今朝林下忘言說。強把新詩寄謫仙。

賦得寒月寄齊己

松下清風吹我襟。上方鐘磬夜沈沈。已知廬嶽塵埃絕。更憶寒山雪月深。高謝萬緣消祖意。朗吟千首亦師心。豈知名徧出諸夏。石上棲禪竹影浸。

送職方王郎中吏部劉員外自太原鄭相公幙繼奉徵書歸省署

雙鳳銜書次第飛。玉皇催促列仙歸。雲開日月臨青瑣。風卷煙霞上紫微。蓮影一時空儉府。蘭香同處撲堯衣。此生長掃朱門者。每向人間夢粉闈。

送蘄州裴員外

正作南宮第一人。暫隨寬旆愴離羣。曉從闕下辭天子。春向江頭待使君。五馬尙迷青瑣路。雙魚猶惹翠

蘭芬明朝無路尋歸處。禁樹參差隔紫雲。

送李秀才入軍

弱柳貞松一地栽。不因霜霰自難媒。書生只是平時物。男子爭無亂世才。鐵馬已隨紅旆去。同人猶著白衣來。到頭功業須如此。莫爲初心首重回。

公子家二首

曾是皇家幾世侯。入雲高第照神州。柳遮門戶橫金鎖。花擁絃歌咽畫樓。錦袖妬姬爭巧笑。玉銜嬌馬索閑遊。麻衣酷獻平生業。醉倚春風不點頭。  
柳底花陰壓露塵。醉煙輕罩一團春。鴛鴦占水能嗔客。鸚鵡嫌籠解罵人。騷憂似龍隨日換。輕盈如燕逐年新。不知買盡長安笑。活得蒼生幾戶貧。

貧女

平生不識繡衣裳。閑把荆簪益自傷。鏡裏祇應諳素貌。人間多自重紅粧。當年未嫁還憂老。終日求媒卽道狂。兩意定知無說處。暗垂珠泪滴蠶筐。

月

狡兔頑蟾死復生。渡雲經漢澹還明。夜長雖耐對君坐。年少不禁隨爾行。玉桂影搖烏鵲動。金波寒注鬼神驚。人間半被虛拋擲。唯向孤吟客有情。

風

喜怒寒暄直不勻。終無形狀始無因。能將塵土平欺客。愛把波瀾枉陷人。飄樂遞香隨日在。綻花開柳逐年新。深知造化由君力。試爲吹噓借與春。

秋

傍雨依風冷漸勻。更憑青女事精神。來時將得幾多雁。到處求他無限人。能被綠楊深懊惱。謾假黃菊送慇懃。鄒家不用偏吹律。到底榮枯也自均。

松

地聳蒼龍勢抱雲。天教青共衆材分。孤標百尺雪中見。長嘯一聲風裏聞。桃李傍他真是佞。藤蘿攀爾亦非羣。平生相愛應相識。誰道修篁勝此君。

牡丹

司空表聖有絕句云。芙蓉騷客空留怨。芍藥詩家只寄情。誰似天才李山甫。牡丹屬思亦縱橫。蓋指此詩也。

邀勒春風不蚤開。衆芳飄後上樓臺。數苞仙豔火中出。一片異香天上來。曉露精神妖欲動。暮煙情態恨成堆。知君也解相輕薄。斜凭闌干首重迴。

菊

籬下霜前偶得存。忍教遲晚避蘭蓀。也銷造化無多力。未受陽和一點恩。栽處不容依玉砌。要時還許上

金罇陶潛沒後誰知己。露滴幽叢見淚痕。

劉員外寄移菊

秋來綠樹復綠牆。怕共平蕪一例荒。顏色不能隨地變。風流唯解逐人香。煙含細葉交加碧。露拆寒英次第黃。深謝栽培與知賞。但慚終歲待重陽。

落花

落拓東風不藉春。吹開吹謝兩何因。當時曾見笑筵主。今日自爲行路塵。顏色卻還天上女。馨香留與世間人。明年寒食重相見。零淚無端又溼巾。

遷居清溪和劉書記見示

擔錫歸來竹繞谿。過津曾笑魯儒迷。端居味道塵勞息。扣寂眠雲心行齊。還似村家無寵祿。時將隣叟話幽棲。山衣毳爛唯添野。石井源清不貯泥。祖意豈從年臘得。松枝肯爲雪霜低。晚天吟望秋光重。雨陳橫空蔽斷蜺。

游俠兒

好把雄姿渾世塵。一場閑事莫因循。荆軻只爲閑言語。不與燕丹了得人。

下第出春明門

曾和秋雨驅愁入。卻向春風領恨回。深謝灞陵隄畔柳。與人頭上拂塵埃。

滄浪峽

走穀飛蹄過此傍。幾人留意問滄浪。煙波莫笑趨名客。爲愛朝宗日夜忙。

項羽廟

爲虜爲王盡偶然。有何羞見漢江船。停分天下猶嫌少。何要行人贈紙錢。

望思臺

君父昏蒙死不回。謾將平地築高臺。九層黃土是何物。銷得向前冤恨來。

代崇徽公主意

金釵墜地鬢堆雲。自別朝陽帝豈聞。遣妾一身安社稷。不知何處用將軍。

贈宿將

詩話總  
龜補

校獵燕山經幾春。雕弓白羽不離身。年來馬上渾無力。望見飛鴻指似人。

柳十首

灞岸江頭臘雪消。東風偷軟入纖條。春來不忍登樓望。萬架金絲着地嬌。受盡風霜得到春。一條條是逐年新。尋常送別無餘事。爭忍攀將過與人。長恨陽和也世情。把香和豔與紅英。家家只是栽桃李。獨自無根到處生。

只爲遮樓又拂橋。被人催折好枝條。假饒張緒如今在。須把風流暗裏銷。  
弱帶低垂可自由。傍他門戶倚他樓。金風不解相撩舉。露壓烟欺直到秋。  
終日堂前學畫眉。幾人曾道勝花枝。試看三月春殘後。門外青陰是阿誰。  
也曾飛絮謝家庭。從此風流別有名。不是向人無用處。一枝愁殺別離情。  
從來只是愛花人。楊柳何曾占得春。多向客亭門外立。與他迎送往來塵。  
強扶柔態酒難醒。帶著春風別有情。公子王孫且相伴。與君俱得幾時榮。  
無賴秋風斗送寒。萬條烟罩一時乾。遊人若要春消息。直向江頭臘後看。

張 孜

攷京兆人。耽酒如狂。與李山甫善。

唐詩紀事。孜有夢李白歌云。夢破青霄春。煙霞無去塵。若誇郭璞五色筆。江淹卻是尋常人。又云。華山秀作英雄骨。黃河瀉出縱橫才。

雪 詩

長安大雪天。鳥雀難相覓。其中豪貴家。搗椒泥四壁。到處爇紅爐。周迴下羅幕。暖手調金絲。蘸甲斟瓊液。  
醉唱玉塵飛。困融香汗滴。豈知飢寒人。手腳生皴劈。

公 乘 億

億字壽仙。魏人。咸通末登進士第。爲魏博節度使樂彥禎從事。加授侍郎。

據言。億有句云。十上十年。皆落第一家。一半已成塵。

賦得郎官上應列宿

北極佇文昌。南官曉拜郎。紫泥乘帝澤。銀印佩天光。緯結三台側。鉤連四輔傍。佐商依傳說。仕漢笑馮唐。委佩搖秋色。峨冠帶晚霜。自然符列象。千古耀巖廊。

春風扇微和

麗日催遲景。和風扇早春。暖浮丹鳳闕。韶媚黑龍津。澹蕩迎仙仗。霏微送畫輪。綠搖宮柳嫩。紅待禁花新。舞席潛迴雪。歌筵暗起塵。幸當陽候律。一顧及佳晨。

賦得秋菊有佳色

陶令籬邊菊。秋來色轉佳。翠攢千片葉。金剪一枝花。蕊逐蜂鬚亂。英隨蝶翅斜。帶香飄綠綺。和酒上烏紗。散漫搖霜彩。嬌妍漏日華。芳菲彭澤見。更稱在誰家。

賦得臨江遲來客

江上晚沈沈。煙波一望深。向來殊未至。何處擬相尋。柳結重重眼。萍翻寸寸心。暮山期共眺。寒渚待同臨。北去魚無信。南飛雁絕音。思君不可見。使我獨愁吟。